


# AMANNYA AGAVVOOLA

 Weebale, Ow'oluganda Neville. Kino mbadde—mbadde sikisuubira. Ssaabadde wa kubeera wano olwa leero. Naye, akawungeezi ka leero wajja kubaawo okulya okussa ekimu, kale nna—nnalowoozezza nti ob'olyawo nsobola okujja ku makya. Era nnakubidde Ow'oluganda Neville essimu, n'agamba nti, "Naye, kati, bw'oba onaabeerawo," n'agamba, "lwaki tobuulirako gye tuli?"

<sup>2</sup> Naye muli ne ndowoozaamu nti, kale, ne bwe nnaaba nsobodde okujja, singa kinaaba kisobose, nnyinza obutabuulira, naye nmandyagadde okwogerako eri ekkansa ku nsonga, nga bwe mumanyi, ze ndowooza nti ziyinza okuzzaamu ekkansa amaanyi.

<sup>3</sup> Twakakomawo okuva—okuva mu lugendo lwaffe olw'okuyigga olukomekkereza omwaka, nze wamu n'ab'oluganda, bano wano, era twalina ekiseera ekirungi ddala. Tuli—tuli basanyufu nnyo, fenna twajjuza, ne—ne tufuna n'omuyiggo gwaffe gwe twali tunoonya. Era—era nze n'omusumba waffe tumanyi bulungi ddala ennyama y'ensolo ez'omu nsiko bw'eri ennungi, ennyo ddala. Kale twafunayo empeewo ennungi. Era nnafunayo eddubu n'empeewo bbiri. Bwe tutyo ne tukomawo.

<sup>4</sup> Era kino kye kisaanidde okuba ekiseera we nnina okubuulirira ku Bubonero obwo omusanvu obusembayo. Naye ekkansa tebaasobola kugimaliriza. Era waliwo ekintu, ekiziyiza, ekyaviirako ekyo. Era, ndowooza abakulira ekibuga be batukaluubirizza, olw'obutaba na kifo kimala aw'okusimba emmotoka olw'obungi bw'abantu be...ekkanisa b'enaaba etuza.

<sup>5</sup> Wano twagala kuzimbawo kizimbe kya kkanisa kipya, era twamazze okufuna ekitundu ekiwerako ekya ssente ze twetaaga olw'enteekateeka eyo, eya—ey'okuzimba e—ekkanisa ennene. Naye emirundi gye tubaddenga n'enkuŋŋaana bwe ziti, wewaawo, mumanyi bulungi ekibaawo. Kiba kintu ekinakuwaza ennyo. Okulaba abantu nga bayimiridde beesigamye ebisenge, abalala nga bali wabweru mu nkuba, kale—kale—kale kyennyamiza nnyo. Nfuna n'okukolokotebwa okuva eri mikwano gyange. Nga banŋamba nti, "Ow'oluganda Branham, kirabika nga..." Waliwo dokita mukwano gwange, yanŋamba nti, "Olabika weetaaga okufunayo ekifo ekirala." N'agamba nti, "Bambi mpulira ennaku, nga bayitawo."

<sup>6</sup> Waliwo ne nnansi muliraanwa wange, yanŋamba nti, "Nze, lumu nnajjaye ku ssaawa kkumi n'emu ez'okumakya. Ku olwo waali wa kubaawo..." N'agamba nti, "Naye nnagenda

okutuuka ku kkanisa nga abantu baakunŋaanye dda, ku ssaawa kkumi n'emu ez'okumakya. Ate nga wali wa kutuukawo ku ssaawa ssatu n'ekitundu." Kale, mukiraba, ddala kikaluubiriza.

<sup>7</sup> N'olwekyo twagala ekkalisa engazi obulungi, buli muntu mw'asobola okufuna ekifo n'atuula n'akkalira. Era tulowooza nti tuli mu nnaku ez'oluvannyuma, kye tukkiriza. We tuteekwa . . . okuba nga tuyigiriza Ekkalisa—ku—ku bintu bino, ebinaatera okubaawo, ebintu ebyalagulwako, ebimu ku byo, okumala enkumi n'enkumi z'emyaka. Nga ne wakati w'emyaka abiri mu etaano n'asatu, mu kkanisa eno yennyini, waliwo ebyalagulwako, nti bijja kutuukirira. Era nga kati tubiraba nga bituukirira. N'olwekyo tusaanye okuba nga tuzza buggya ebintu bino, naye tetulina kifo kimala. Kale enkya ya leero . . .

<sup>8</sup> Eggulo, nnabadde nkuba amasimu wamu n'okubaako ebintu ebirala bye nkolako, nga n'olweggulo lwa leero, nnina amasimu amalala ag'okukuba, n'ebirala eby'okukolako. Waabaddewo n'abantu abaabadde baagala okunsisinkana, waliwo omuvubuka omulungi ddala, eyafuna okwennyika mu mutima, ow'oluganda omuweereza nga ali ku mulimu gw'enjiri. N'abalala bwe batyo, n'ow'oluganda okuva e Norway. Era—era nnabasisinkanye ne tuwayaamu mu kasenge emabega. Bwe nnamalirizza ne nŋamba nti, "Kale, kati ndowooza, ka tufulume."

<sup>9</sup> Ow'oluganda Neville kwe kutugamba nti, "Naye era, tusobola okujja ne tubaako ebigambo ebitonotono eby'okuzzaamu amaanyi bye twogera eri Ekkalisa." Eki- . . .

<sup>10</sup> Ekimu ku bintu ebisooka bye njagala okwogera. Nninawo wano bye nnawandiise ku lupapula, bye, nnayagadde okwogerako, nga nzize mu kkanisa. Ekimu ku bye nnawandiise ky'ekikwata ku kufa kwa Muganda waffe omwagalwa Taylor bwe twali tetuliwo.

<sup>11</sup> Ow'oluganda Taylor abaddenga asabira mu kkanisa eno okumala emyaka n'emyaka. Era nkakasa, nga fenna tubadde tumumanyi. Naye bwe wabaawo abagenyi mu makkati gaffe, ye mwami oyo omulungi nnamukadde eyabayambanga okubafunira ekifo, aw'okutuula. Ow'oluganda Taylor, omulundi gwe nnasembayo okumulaba, okutuusa lwe ndiddamu okumulaba nga muvubuka, yali ayimiridde awo ku luggi wiiki nga ssatu oba nnya eziyise. Yanŋamba nti, "Nnandyagadde okufunayo ku bitabo, Ow'oluganda Branham. Njagala kugaba bitabo bino." Kale tu, ya . . .

<sup>12</sup> Kye nategeddeko, yalina obulwadde bwa sukaali kale yazirika, ate nga yali ta . . . yali tamanyi nti mulwadde wa sukaali. Era—era yali . . . N'afa. Weewaawo teyafa. Naye yagenda kubeera ne Mukama waffe Yesu.

<sup>13</sup> Era yali waaluganda omwesigwa, era omulungi ennyo, nga bulijjo afaayo eri abantu abalala. Era ekyamusanyusanga

kwe kubaako omuntu gw'afunira ekifo aw'okutuula, nga azze mu kkanisa. Era kati, ob'olyawo, bwe tulisomoka Omusittale, tekiriba kirungi okusangayo Ow'oluganda Taylor, nga y'atufunira ebifo aw'okutuula, erudda eri?

<sup>14</sup> Ndowooza, mu kujjukira Ow'oluganda Taylor... Ssaaliwo kukyogerako n'Ow'oluganda Neville, mu kuziika, naye njagala okubaako ne kye njogera okutuusa okusiima kwange, eri nnamwandu we. Mwannyinaffe Taylor, nzikiriza, alina wano w'atudde enkya ya leero, Mukama awe omukisa omutima gwe omwesimbu!

<sup>15</sup> Ow'oluganda Taylor, lumu yanjamba nti, "Jangu ondabeko. Nninyo akayanja ke nnasima erudda eyo, ne nteekamu ku byennyanya, kale osobola okujjayo n'ovuba." Lubeerera yali afaayo ku muntu omulala. Era naye waliwo Omuntu eyali amufaako, nga oyo ye Kristo, eyamuwa obulokozi.

<sup>16</sup> Ndowooza, mu kumujjukira, nate era, ku lw'ekkanisa eno, nga bwe tukunjaanye awamu fenna nga omubiri enkya ya leero, leka tuyimirire fenna awamu, tukoteke emitwe gyaffe mu maaso ga Katonda.

<sup>17</sup> Kitaffe ow'omu Ggulu, ffe nga abantu enkya ya leero, wamu ne—n'abo abajja mu sinzizo lino... Omukono Gwo ogw'amaanyi gutambudde ne guyita mu makkati gaffe ne gutuggyako omu ku b'oluganda abaagalwa gwe twagala, era gwe tumanyi nti Naawe obadde omwagala. Era nga Walina ensonga bino byonna okubaawo, ayi Mukama, nga singa si bwe kyali tekyandibaddewo bwe kityo, nga tumanyi nti Bayibuli yaffe etugamba, nti, "Ebintu byonna bikolera wamu ku lw'obulungi eri abo abaagala Katonda." Era nga yali amwagala.

<sup>18</sup> Era twetoolooza amaaso, mu nsi, ne tukizuula nti mu buli ngeri obutonde bwogera gye tuli, nga bututegeeza nti amagombe tegayinza kumulemera, kubanga ku nsi yatuukiriza ekigendererwa kye Wamutuma okujja wano okukola. Yali waaluganda mulungi, era omwesigwa.

<sup>19</sup> Tukizuula nti mu bulamu bw'ebimera, ne mu bulamu bw'enjuba evaayo buli ku makya okutuwa ekitangaala. Bw'etuuka mu ttuntu n'eba nga etuuse mu myaka gyayo egy'obuvubuka. Ate akawungeezi n'eddamu n'efa, ate n'evaayo nate enkeera, nga mpya era ejjudde amaanyi, kubanga yatuukirizza ekigendererwa kya Katonda.

<sup>20</sup> Tulaba ebimuli engeri gye bitojjera ne bitonaatona ensi ne bikozesebwa mu kutimba ebifo omukolerwa emikolo gy'okuziika, wamu n'ebifo omukolerwa embaga, nga bituukiriza ekigendererwa kyabyo; nga byanjuluza omutima gwabyo, ne biwaayo kyonna kye birina, buwa, ne biwa omubisi eri enjuki, akaloosa eri omuyise, n'obulungi eri oyo anoonya. Ne kiwaayo byonna bye kirina, olw'okuweereza Katonda, oluvannyuma ne kikoteka omutwe gwakyo. Naye ate ekiseera bwe kituuka

eky'enkuba eya ddumbi, ne kiddamu ne kisituka, kubanga kyatuukiriza ekigendererwa kya Katonda.

<sup>21</sup> Na bwe kityo nga tusinziira ku bujulizi bw'obutonde bwonna, ne Bayibuli, n'ekisuubizo, awamu n'Omwoyo Omutukuvu, tusobola okujaguza n'essanyu mu mitima gyaffe, okukimanya nti ne Muganda waffe Taylor, mu ngeri y'emu, ayi Mukama, yatuukiriza ekigendererwa kya Katonda. Era bwe tugamba nti talizuukira tuba twegaanye Bayibuli yaffe, ne Katonda waffe, n'ebintu byonna Katonda bye yatuwa okulabirako, okutegeera nti waliwo okuzuukira. Kale twesunga ekiseera lwe tuliddamu okumulaba nate, nga muto era nga alabika bulungi nga takyaddamu kulwala yadde okukaddiwa.

<sup>22</sup> Tukasaba owe omukisa mukyala we omwagalwa, oyo omubeezi we omwagalwa. Nga tugenda kubasubwa, nnyo, ayi Mukama, okubalaba nga batambula wamu bagenda ku kidiba, ne batuula ku butebe wabweru awo, ne bavuba, nga bwe banyumyamu, nga babadde baagalana nnyo.

<sup>23</sup> Naye kati tumanyi nga waliyo Olunaku olukulu olujja, abazira ab'okukkiriza lwe balikumba nga bayita mu mulyango omunene ogw'obuwanguzi, Bamalayika ba...we balijjuza obwengula n'ennyimba. Tuliddamu ne tubalaba mu kifo ekyo.

<sup>24</sup> Okutuusa lwe tulituuka mu kiseera ekyo, ayi Mukama, tuwe obuvumu. Tuwe omukisa era otuyambe. Tugenda kusubwa nnyo Ow'oluganda Taylor, na buli muntu ajja mu kkanisa eno, engeri gy'abaddenga ayimirira ku luggi n'alinda okufunira ekifo oyo aba azze asobole okuwulira Ekigambo kya Katonda, atuule ntende era akkalire.

<sup>25</sup> Luli bwe yasomoka, ayi Mukama, nnasaba nti leka Malayika wa Katonda oyo omukulu ayimirire awo ku luggi, ayi Mukama, naye amufunire ekifo, w'asobola okutuula. Kubanga kyawandiikibwa mu Bayibuli nti, "Ab'ekisa balikwatirwa ekisa." Okutuusa lwe tulimulaba, ayi Mukama, leka tumujjukirenga n'essanyu mu mitima gyaffe, okutuusa lumu lwe tuliddamu ne tuisinkana mu Nsi endala. Tukisabye okuyita mu Linnya lya Yesu Kristo. Amiina.

<sup>26</sup> Tujja kumusubwa nnyo mu makkati gaffe wamu n'abagenyi abajja mu makkati gaffe, n'abalala, abajja mu kkanisa yaffe, manyanga mu kizimbe kyaffe wano, okusinza. Emmeeme ye ewummule mirembe mu maaso ga Katonda, okutuusa ku Lunaku luli.

<sup>27</sup> Olunaku lumu, naffe, buli omu ku ffe tuligenda, omu ku omu, okutuusa fenna lwe tuliggwerayo bwe tutyo. Leka kaakano, nga bwe tukyalina obudde, era nga tukyasobola, leka twetegekere ekiseera ekyo ekigenda okujja; kubanga tetumanyi ddi lwe kiribaawo. Tetumanyi ani anaddako. Leka tutambulire mu bulamu, kibeere nti buli lunaku olukya, singa ekiseera ekyo kituuka, nga ffe ab'okugenda, tusangibwe nga tweteeseteese.

<sup>28</sup> Kati, njagala okubaako ebirango bye nnanga. Kati, mu kiseera ekitali kya wala, kyandiba, oba oli awo, ssinnaba kwogeramu na bayima ba kkanisa kasookedde nkomawo, ku bikwata ku by'okuzimba e—ekkanisa wano, oba okwojera ku kye tulina okuzzaako, okusobola okufuna ekkkanisa yaffe tusobole okuba n'enkuŋŋaana zaffe. Kitegeeza njenda kugenda mu maaso, munsonyiweko, ne—n'Obubonero Omusanvu, oluvannyuma nkwate ku Bibya Omusanvu, wamu n'ebintu ebirala bingi bye tulina okuba nga tuyigako, amangu ddala.

<sup>29</sup> Kati, Ssande ejja ku makya, eyo, nja kubeera mu Elizabethtown, mu Kentucky, wamu n'Ow'oluganda L. G. Hoover, mu lukunŋaana olw'okuwongayo. Era kujja kuba kuwongayo ekkunŋaaniro eriggya, manya ekkunŋaaniro lye baagula erisangibwa mu Elizabethtown, Kentucky. Okwata luguudo lwa 62 okutuusa lw'otuuka mu Elizabethtown, manyanga okwata, mbadde ntegeeza, lwa 31, oba osobola okukwata oluguudo lw'okusasulira. N'okwata ekkubo eryo erivaako, ne likutwala okutuuka mu Elizabethtown. Lugendo lwa ssaawa nga emu. Waliwo mayiro nga asatu mu ttaano, oba ana okutuukayo. Ndowooza, ziri mayiro nga amakumi ana, bw'oyita. . . ku lwa 31, ate mayiro nga asatu mu ttaano, oba bwe watyo, bw'oyita mu kkubo liri eddala, lye basasulira. Kiri ku Luguudo oluyitibwa Mulberry.

<sup>30</sup> Lujja kuba lukunŋaana lwa kuwongayo. Ow'oluganda Hoover ajja kubuulira olukunŋaana lwa Ssande olwa bulijjo ku ssaawa nnya. Ate nze mbuulire olukunŋaana olw'okuwongayo, okuva ku ssaawa ttaano okutuuka ku mukaaga, ku Ssande eno ejja, nga kkumi na lumu Novemba.

<sup>31</sup> Musobola okufuna ebisingawo ku lubaawo awalangirwa ebirango wabweru wali, we wali—we wali ebisingawo. Era lujja kuba. . . Endagiriro mujja kugiggya awo. Ekkkanisa esangibwa ku Luguudo lwe bayita Mulberry. Oba ba—baataddeko endagiriro ku. . . Eri ku lubaawo awalangirwa ebirango wabweru awo mu maaso g'ekkanisa.

<sup>32</sup> Ate, nga—nga abiri mu bbiri o—omwezi gwa Novemba, nja kubeera mu Shreveport, Louisiana, okuva nga abiri mu bbiri, abiri mu ssatu, abiri mu nnya, abiri mu ttaano, ne—n'abiri mu omukaaga. Ndowooza, ziri ennaku ttaano, mu Shreveport, Louisiana, mu kkanisa ya Life Tabernacle. Wamu n'Ow'oluganda Moore. Bajja kuba bajaguzza jjubireewo ey'emyaka amakumi ataano. Omukisa gwa pentekoote gwakka mu Shreveport, Louisiana, emyaka makumi ataano egiyise, nga abiri mu bbiri omwezi guno. Emyaka amakumi ataano egiyise, obubaka bwa pentekoote obwasooka lwe bwabuulirwa. Era, Omwoyo Omutukuvu n'akka, mu Louisiana. Era babeera n'enkuŋŋaana ez'okujjukira ekiseera ekyo, nga ku mulundi guno eno jjubireewo ya myaka amakumi ataano. Kale nja kuba mbuulira mu jjubireewo eno, okumala ebiro bitaano, wamu

n'Ow'oluganda Moore, mu Shreveport, mu kkanisa ya Life Tabernacle.

<sup>33</sup> Kale bw'obaayo ne mikwano gyo erudda eyo n'okwetoloola awo wonna, bw'oba wandyagadde okubawandiikira okubaaniriza, oba ekintu bwe kityo, tunaasanyuka okuba nabo. Kale osobola okubategeza ku nkunjaana ezo ezigenda okubaawo.

<sup>34</sup> Era ekkkanisa ya Life Tabernacle, bwe wabaawo omuntu yenna eyali abaddeyo wamu n'Ow'oluganda Moore, musajja mulungi nnyo. Era waliyo abantu abalungi ennyo ddala, abantu abo ab'edda ab'omu Maserengeta. Toyinza kubasinga. Kale n'olwekyo, ekkkanisa ya Life Tabernacle, osobola okubaako omuntu yenna ow'omu Shreveport gw'obuuzza asobola okukulagirira wa weeri. Shreveport kirimu abantu nga emitwalo abiri. Era kibuga kirungi nnyo, era kirimu ebifo eby'okusulamu ebiberera ddala. Kale . . .

<sup>35</sup> N'ekizimbe ky'ekunjaaniri kinene bulungi, kizimbe kinene nnyo. Kirina emyaliro egya waggulu, n'ebisasi, n'emyaliro egya wansi egisookerwako, n'omwaliro omulala wansi. Kale waliwo ekifo ekigazi obulungi. Ate kiri mu maaso ga kizimbe ky'ekibuga omukolebwa ebintu eby'enjawulo ekituuza abantu enkumi ttaano. Kiri—kiringa bw'oyinza okusala wano oluguudo, okutuuka ku kizimbe ky'ekibuga ekyo ekikolerwamu emikolo egitali gimu.

<sup>36</sup> Kale Levirandi Jack T. Moore, manya—manya eyo y'ekkanisa ya Life Tabernacle e Shreveport, mu Louisiana. Kale ziritandika nga abiri mu bbiri. Luliba Lwakusa-. . .Lwakuna okutuusa ku Ssande. Lwakuna, Lwakutaano, Lwamukaaga, Ssande, ziri nnaku nnya so si ttaano. Munsonyiweko. Z'ennaku z'omwezi abiri mu bbiri, abiri mu ssatu, abiri mu nnya, n'abiri mu ettaano. Ndowooza bwe kityo bwe kiri, omwezi gwa—gwa Novemba.

<sup>37</sup> Bwe ziriba ziwedde, tujja kumanya, kye tunaaba tukoze ku kkanisa eno wano, tutegeere wa ekkkanisa w'etuuse mu kufuna ekizimbe kyayo. Ba kontulakita abaaweewba omulimu batugamba bakyasobola okuteekako abasajja abamala, ne kiba nti mu nnaku nga kkumi baba bamalirizza ne tusobola okukiyingira, mukiraba, mangu ddala. Naye bakyalinze bakulira kibuga kussaako mukono. Ate nga bwe mumanyi, tulina okuba n'ekifo ekigazi aw'okusimba emmotoka, n'ebirala *bino*. Kale, ha, bannange, emisoso mingi nnyo gy'olina okuyitamu, okutandika okuzimba. Naye nandyagadde nkomewo mu kkanisa nga sinnaddayo mu buweereza bw'ebweru.

<sup>38</sup> Kati bampita okugenda e Tanganyika, Uganda, n'amawanga agali awo. Joseph yateeseese enkunjaana ezo nga zaakutandika mu mwezi gwa Febwali.

<sup>39</sup> Ate olunaku olwa jjo, bwe nnakomyewo, waabaddewo ab'oluganda, abaabadde ne Mwannyinaffe Thomas, okuva emitala w'amayanja, abaabadde bazze. Era baabadde... Nnasanze akapapula ku luggi lw'ewange, manyanga—ebbaluwa empita okuva mu—mu kibiina ekimu emmanga eri mu South Afirika. Kale ngezaako okubawandikira, tulabe kiki ekiyinzza okukolebwa. Osanga, bwe nnaagenda erudda eri, nnaasobola okuyitirako ne mu South Afirika, oba oli awo, mu mwezi gwa Febwali nga guggwaako oba ogwa Maaci, awo bwe watyo.

<sup>40</sup> Kale tusuubira okuba nga ekkansa tugimalirizza, nsobole okuyigiriza ku Mirembe gy'Ekkansa gino, nga—ekiseera ky'obutiti tekinnatandika, bwe kinaaba kisobose. Bwe nnaaba sikikoze, oba ndikikola bwe ndiba nkomyewo okuva eyo, Mukama waffe Yesu bw'aliba tannajja.

<sup>41</sup> Eggulo nnabadde mpuliriza bwe nnabadde nga nkwata, nzikiriza kyaliwo kwosa ggulo, bwe nnali nkwata olutambi. Ndwooza nnaluwulidde luzannyibwa wano enkya ya leero. Waliwo ow'oluganda omu ava mu Maserengeta eyalina... Maama we yali azze mu lukunjaana. Yalina ekizimba ku bbeere, era nga aliko ekisiikirize ky'okufa. Era Omwoyo Omutukuvu, mu lumu ku nkunjaana ezaakaggwa, ezaali mu Southern Pines, ndwooza gye kyali, oba awantu awamu, yamubuulira, ebikwata ku kizimba kye yalina, n'amannya ge, ne gy'ava. Era n'amugamba nga bw'alina omuvubuka eyali yagwa n'ava mu kukkiriza, nti yali agenda kugwa ku kabenje, era bamuvunaane ogw'okutta omuntu. N'ebintu ebirala bingi bwe bityo. Era omuvubuka ono...

<sup>42</sup> Byonna byatuukirira nga bwe byamutegeezebwa. N'ekizimba kye ekyo kookolo, oba ekizimba kye yalina, manya, ne kimuvaako. Weewaawo, mukimanyi nti, ekizimba bwe kityo aba kookolo. Kale kya—kyamuvaako. N'omuvubuka n'avunaanibwa ogw'okutta omuntu, buli kimu ne kibaawo mu ngeri yennyini ddala nga Omwoyo Omutukuvu bwe yabyogera. Era n'akulemberwa okudda eri Kristo, nate. Bw'atyo n'abikwata ku lutambi, era nna—nnaluwulirizza nga luzannya. Mwanyumiddwa embooz y'omusajja oyo, ava mu Maserengeta? [Ekibiina kiddamu nti, "Amiina."—Omuk.] Bwe yagambye nti, "Emmanga eno mu Bukiikakkono bwa Carolina," nga anyumya. Bannange, ekyo nkyagala nnyo, njagala nnyo abantu abo ab'omu Maserengeta. Era yalina... Ddala Mukama yamuwa omukisa. Yagambye nti, "Mmanyi ogamba tobuulira njigiriza, Ow'oluganda Branham; okuggyako eri ekibiina kyo kyokka." N'agamba nti, "Naye naffe tuli kitundu ku kibiina kyo." Kale ekyo kyabadde kirungi nnyo, ye okukyogera.

<sup>43</sup> Naye kati ekifaananyi kiikyo, ndwooza, oba oli awo, kyatimbiddwa ku lubaawo awalangirwa ebirango enkya ya leero. Bwe kiba tekiriiko, Billy ajja ku kiteekako. Emirundi mingi kizze kyogerwa, ne bwe nnali nnaakatandika okwogera,

banjamba mbu, “Ekyo okiteebereza buteereza, Ow’oluganda Branham, nti olaba Ekitangaala ekyo, Ekitangaala ekyo.” Oba oli awo wandiba nga, tewali . . .

<sup>44</sup> Wandiba nga waliwo abakyaliwo, abamu ku abo ab’edda abajjukira ekyaliwo mu kiseera ekyo, ekifaananyi ky’Ekitangaala ekyo bwe kyali tekinakubibwa. Waliwo omuntu yenna ali wano ajjukira okumpulira nga nkyogera ekyo, edda ennyo? Mulabeeyo. Waliwo emikono ena oba etaano. Mwannyinaffe Spencer wano eno, n’Ow’oluganda ne Mwannyinaffe Slaughter, ne—n’ow’oluganda ono ali *wano*, n’ow’oluganda oli *wali*. Waliwo abantu nga bataano oba mukaaga ku abo abaaliwo ab’edda.

<sup>45</sup> Naye, kati, kyaddaaki, eriiso lya kamera lyakwata ekifaananyi ekyo. Ne kitwalibwa mu Washington, DC ne kyekebejjibwa, ne kikomawo nga bagamba nti, “Si kifaananyi ekigombaganye ne kinnaakyo oba ekintu ekirala kyonna.” N’agamba nti, “Kyali Kitangaala kye kyakuba mu liiso lya kamera.” Oyo ye George J. Lacy. N’assaako n’omukono gwe. Mukiraba?

<sup>46</sup> Kale, kati, emirundi mingi mumpulira, bwe ntunula mu kibiina nga njamba nti, “Omuntu *ono* aliko ekisiikirize eky’ekizikiza. Aliko ekisiikirize ky’okufa.” Ekyo bameka abaali bampulidde nga nkyogera? Emirundi mingi, mukiraba, emirundi mingi. Kati nno, ku mulundi guno kamera yakikwata. Era kiikino wano tukirina.

<sup>47</sup> Waliwo omukyala eyajja eri mwannyinaffe n’amugamba nti, mu lukunjaana olwali mu—mu Carolina, gye twalina olukunjaana olulungi ennyo ddala mu Southern Pines. Era nga tuli eyo, omukyala oyo yalina kookolo ku mabeere gombi nga amutta. Nga abasawo baamuwaayo afe. Omukyala n’asituka n’amukuba ekifaananyi, bwe nnamugamba erinnya lye, ne gye yali ava. Ne mmugamba nti, “Weetooloddwa ekisiikirize eky’ekizikiza. Oliko ekisiikirize ky’okufa.” Omukyala n’akikuba ekifaananyi. Era kiikyo awo ku liiso lya kkamera, eyakwata ekisiikirize eky’okufa.

<sup>48</sup> Bwe wabaawo omu ku mmwe eyali alabye firimu y’*Amateeka Ekkumi*, n’alaba malayika ow’okufa, bwe yayitanga, nga ekisiikirize, ekikutte ekizikiza era eky’entiisa, ne ku kifaananyi kino bwe kiri. Era ndowooza nga kati kitimbiddwa ku lubaawo we balangira ebirango. Bwe kiba tekiriwo, Billy bw’aba ampulira, mumugambe, akiteeke ku lubaawo awalangirwa ebirango. Era kuliko ekiriko akasaale akasonze ku muntu oyo. Era omuntu oyo, omukazi oyo ekisiikirize kyamuvaako, era n’awonyezebwa mu ngeri ey’ekyamagero. Naye waliwo ekintu ekyefaananyiriza ekikookolo, omukka omukwafu nga gwetoolodde gukoze engeri y’ekikookoolo okwetooloola omukyala oyo, nga kirengejjera



ku kookolo oyo bwe kityo, nga kiva awo. Weewaawo, era, ekyo ky'ekisiikirize okufa mwe kuyita, nga kiva ku kookolo.

<sup>49</sup> Kale, ne bw'ogezaako otya okubuulira abantu Amazima, era wajja kubaawo ajja okugabuusabuusa nti si ge Mazima. Naye kati bulijjo bw'oyogera Amazima, obeera mukakafu nti oli—oli mutuufu.

<sup>50</sup> Nnina mukwano gwange—omulunzi, erudda eri mu Bugwanjuba. Era—abalabirira obutonde bw'ensi baawaayo ddoola enkumi nnya okufuna akamotoka akatambulira ku muzira, okusobola okubala eggana ly'empeewo ezaasigalawo mu kiwonvu ekiyitibwa Troublesome Valley. Mw. Jeverez eyatuulanga wano mu kkanisa, gwe nnakulembera okumuleeta eri Kristo, eyali omukaafiiri awedde emirimu. Era mwali mumpulidde nga nnyunya embooji yaffe nga bwe twavuganga ffembi embalaasi. Era yali takkiririza mu kintu kirala kyonna okuggyako ennono za Darwin. “N'eb'y'Omwana oyo eyazaalibwa embeerera, bya butaliimu.” Era jjuuzi twasiisira mu kifo ekyo kyennyini we yakkiririza Kristo.

<sup>51</sup> Kati omusajja ono yabagamba. Yabagamba nti, “Naye kati, temwetaaga kugula kamotoka ako, akatambulira ku muzira.” N'abagamba nti, “Nze ka mbabuulire omuwendo gw'empeewo eziriyi.” N'agamba nti, “Ziri kkumi na mwenda.” N'agamba nti, “Zaali abiri mu- . . . Zaali abiri mu emu, ne nzitako bbiri.” Ate nga ayogera na mukuumi wa bisolo. Tokkirizibwa kuttako wadde n'emu bw'eti. N'agamba nti, “Zaali abiri mu emu, ne nzitako bbiri. Kitegeeza wasigalawo kkumi na mwenda.”

Omukuumi n'amugamba nti, “Weewaawo, Jeff, mmanyi wattako bbiri.”

N'agamba nti, “Nnazitta.”

<sup>52</sup> Bwe batyo, ne balinnya akamotoka kali akatambulira ku muzira, ne bagendayo, ne basanga nga waliyo empeewo kkumi na mwenda. Kye yava anjamba nti, “Billy, omuntu ne bw'omugamba amazima; era tajja kugakkiriza.”

<sup>53</sup> Era ekyo ddala bwe kiri. Oyizza okubuulira abantu Amazima, ate ne ba . . . Wabaddewo obutategeera bulungi bintu kungi nnyo ne—n'obulimba bungi okutuusa nti abantu tebakyakkiriza nti g'obagamba ge Mazima so nga obagamba Mazima. Mukiraba?

<sup>54</sup> Naye twesiimye nnyo okuba ne Kitaffe ow'omu Ggulu Oyo akakasa Amazima ago n'obukakafu. Kituufu. Kale n'olwekyo luno bwe luba nga lwe lunaku lwange olusembayo ku nsi, e . . . ka kubeere kunoonyereza kwa ssaayansi ka kubeere obukakafu obulala byonna bikakasizza nti bye mbuuliddenga ku bintu bino ge Mazima. Ekyo ddala kituufu. Ge Mazima. Kale oba oli awo kijja kutimbibwa awalangirwa ebirango. Billy, mw'oli mu kizimbe? Ekifaananyi, okirina mu ngalo zo? Bw'oba okirina,

kale, kireete, okitimbe wano, ob'olyawo banaasobola okukiraba. Naye, simanyi. Ku lubaawo, kwa—kwandibaako ekitangaala.

<sup>55</sup> Kati kiikino—kiikino wano ekifaananyi. Ndownooza temuyinza kukiraba. Naye bw'otunula *wano* osobola okulaba ekisiikirize ekyo eky'okufa nga kiri ku mutwe gw'omukazi. Ate kuno *wano* eno kwe kunnyonyola okukwata ku kifaananyi ekyo, omukyala kye yakuba ekifaananyi, okukakasa oba nga ddala kyalabika. Era kiikyo awo, ki—kirabika. Kikookolo kya kisiikirize eky'okufa.

<sup>56</sup> Omukazi, omulaba wano eno? Ndownooza, Ow'oluganda Neville, wali okirabyeko, si bwe kiri? [Ow'oluganda Neville addamu nti, "Weewaawo."—Omu.] Uh-huh.

<sup>57</sup> Kale, Billy ajja kukiteeka awalangirwa ebirango, bw'oba osobola, Billy. Jangu, okinone, okitwale mu maaso okitimbe ku lubaawo awalangirwa ebirango, buli omu asobole okukiraba nga afuluma. Billy oba Doc, omu ku mmwe asobola okukikola. Kati nnabadde ndownooza, nti oba oli awo, munaasobola okukiraba obulungi, naye waliwo enzikiza nnyingi nnyo ku kifaananyi eky'engeri eyo. Naye ajja kukitimba wabweru, musobole okukiraba, bwe munaaba mifuluma.

Kaakati, mujjukire ebirango byonna.

<sup>58</sup> Kale kati, enkya ya leero, nnalowoozezzaamu nti ob'olyawo tunaabaako ekintu ekitonotono kye twogerako eky'okuzzaamu ekkansa amaanyi, ekintu ekinaayongera okubawa . . .

<sup>59</sup> [Ow'oluganda Doc Branham abuuza nti, "Awo ogenda kukozezaawo?"—Omu.] Ogambye ki? ["Ogenda kulukozeza?"] Weewaawo, Doc, bw'oba osobola. Lwandibaako ne we luyamba.

<sup>60</sup> Nnandyagadde okulukozeza. Nnabadde ne... Abamu ku bo tebaasobola kulaba byatekebawo, wiiki ewedde, kale twalowoozeza nti oba oli awo kinaabakola bulungi okubiteekako olwa leero. Nnabadde njagala kubyogerako, kubanga bikwata ku—ku kirooto mwannyinaffe omu kye yaloota.

<sup>61</sup> Ssimanyi oba nga Mwannyinaffe Shepherd mwali mu kkanisa enkya ya leero. Nnamusisinkana ekiro kya luli. Era gwe mulundi gwange ogwasooka okumulaba, eky'amazima, n'okumumanya nnali ssimumanyi. Waali? Alabika taliwo. Weewaawo waali. Ofaayo, kinaakuyisa bubi, singa njuliza ku kirooto ekyo, Mwannyinaffe Shepherd? Tekirina buzibu, si bwe kiri? Kale. Ekyo kirungi.

Kati ekyo nga tetunnakiyingiramu, leka nate tuddemu tukoteke emitwe gyaffe.

<sup>62</sup> Kitaffe ow'omu Ggulu ow'ekisa, tukutendereza olw'obulungi Bwo bwonna n'okusaasira. Era kaakano, tukusaba otebenkeze ebirowoozo byaffe, ayi Mukama, tusobole okuyiga Ekigambo kya Katonda omulamu, nga bwe Kijja gye tuli

okuyita mu kwolesebwa ne kikakasibwa Omwoyo Omutukuvu era ne kinywezebwa Bayibuli. Na bwe kityo tukusaba Otuwe okutegeera, tusobole okumanya eky'okukola mu nnaku zino ez'oluvannyuma nga bwe tulaba amaanyi amabi nga gatutaayiza erudda n'erudda mu kaseera kano. Olutalo, olutalo olusembayo lunaatera okulwanibwa. Tuyambe, ayi Mukama. Nga abalwanyani bennyini, ab'amaanyi, tusaba tukuumire waggulu engabo y'Okukkiriza, wamu n'Ekigambo kya Katonda, Ekitala, tugende mu maaso okutabaala. Mu Linnya lya Yesu. Amiina.

<sup>63</sup> Kaakati, nga bwe tulwooza ku kugenda mu maaso okutabaala, nga tugenda mu—mu lutalo olubindabinda, olunaatera okutandika, o—olutalo lwennyini, okulwana olutalo olw'okukkiriza.

<sup>64</sup> Mwannyinaffe Shepherd ono wano, n'Ow'oluganda Shepherd, mikwano gyaffe abaagalwa ennyo, era abasabira mu kkuŋŋaaniro lino. Era baana ba Katonda ab'omuwendo. Kati—kati Mwannyinaffe Shepherd ono, bwe nnabadde ntwala amabaluwa agampandiikirwa, waliwo agamu Billy g'asobola okwanukula, singa oli agamba nti, “Nsindikirayo obugoye obw'ab'okusabirwa.” Mbusabira busabizi. Ye n'ayanukula abera abusabye. Naye bw'eba bbaluwa empandiikiddwa nga nze, mba nnina okugyanukula nze kennyini, mukiraba. Kati nnabadde ntwala ebbaluwa ezampandiikirwa, nga ŋenda nazo eka. Era nnabadde nsoma emu ku zo, nga egamba nti, “Okuva eri Mwannyinaffe Shepherd.” Era kyabadde kirooto kye yali yaloota, e—emyezi mitono egyayita. Naye yalemwa okutegeera amakulu gaakyo okutuusa Ssande nga bbiri oba ssatu eziyise, bwe nnayigiriza ku ky'okuyigako kino ekya—eky'*Emirembe Omusanvu egy'Ekkansa* ne—ne ku—bibala omusanvu, Peetero Eky'okubiri, bwe kigamba, mu Peetero Eky'okubiri 1, “Okwongerera ku kukkiriza kwaffe.” Mukiraba?

<sup>65</sup> Ekisooka, nga gwe musingi, kwe Kukkiriza. Eky'okubiri, ku kukkiriza kwo yongerako, amaanyi; ku maanyi go, okumanya; ku kumanya, oyongerako okwefuga; ku kwefuga, oyongerako okugumiikiriza; ku kugumiikiriza, oyongerako okutya Katonda; okuva ku kutya Katonda, oyongerako okwagala ab'oluganda, okuba n'ekisa eri ab'oluganda; oluvannyuma oyongerako okwagala, nga ly'ejjinja ery'oku ntikko. Ebintu musanvu. Emirembe omusanvu egy'eckansa, mukiraba, n'emmunyenyeny e omusanvu ez'emirembe gy'eckansa, era byonna bigattibwa wamu n'Omwoyo Omutukuvu.

<sup>66</sup> Kati, ebyo bye byetaagisa okusobola okufuuka omuweereza wa Kristo. Kristo azimba Ekkansa Ye mu mirembe musanvu egy'eckansa; Omugole We, Omuntu, omukazi, Ekkansa. Emirembe omusanvu egy'eckansa gyonna awamu gye gikola Omugole. Abamu nga bava mu mulembe *guno*, abalala mu mulembe *guli*, n'abalala mu mulembe *guli*, bonna ne bakunŋaanyizibwa wamu, era nga bazimbiddwa nga piramiidi.

67 Nga Enoka, gwe tukkiriza, okuba nti y'eyazimba piramiidi. Naye ejjinja eritikkira teryassibwako waggulu ku ntikko yaazo, kubanga ejjinja ery'oku mutwe lyagaanibwa. Era tukitwala nti, si nga Enjgiriza, naye okusobola okutegeera, olw'ekkanisa eno wano. Nti zino. . .

68 Katonda alaga okutuukirira Kwe mu busatu. Atuukiririra mu "Kitaffe, Mwana, Mwoyo Mutukuvu," woofiisi ssatu eza Katonda omu. Atuukiririra mu "kuggyibwako omusango, okutukuzibwa, n'okubatizibwa n'Omwoyo Omutukuvu," nga aleeta emirimu gy'ekisa, egituukiridde. Atuukiririra mu kujja kwa mirundi esatu: omulundi ogwasooka, okununula Omugole We; omulundi ogw'okubiri, okutwala Omugole We; n'omulundi ogw'okusatu, mu kufuga okw'Emyaka olukumi n'Omugole We. Era buli kimu kyonna kituukirira mu busatu. Ate musanvu gwe muwendo gwa Katonda ogw'okusinza. Katonda asinzibwa mu musanvu, okumaliriza, kati okutuukirizibwa n'okumalirizibwa.

69 Era ekyewuunyisa kyali nti, kino sigenderera kukigatta ku bino, naye njagala kubalaga bulazi, ennangaazi gye nnasembayo okufuna yalina obusongezo butaano ku ludda olumu n'obulala busatu ku ludda olulala; mukiraba, ekisa n'okutuukirira.

70 Kati mu kino mwetegereze, nti Kristo. Katonda yawandiika Bayibuli ssatu. Bayibuli eyasooka yali mu bwengula, eyitibwa zodiac. Kati, bw'oba tomanyi Kitabo kya Yobu, gwe gyerabire, kubanga, Yobu y'aginnonyonnyola, n'atutegeza nga bwe yatunula waggulu n'atuuma ebintu ebyo ebiri mu bwengula amannya.

71 Kati mulabeeyo, mu zodiac, kiki ky'etandika nakyo? Ekintu ekisooka mu zodiac y'embeerera. Ekintu ekisembayo mu zodiac ye Leo empologoma. Okujja kwa Kristo okwasooka, okuyita mu mbeerera. Okujja okw'okubiri, Leo empologoma, Empologoma y'ekika kya Yuda.

72 Ne Enoka n'amaliriza mu kiseera kye, manyanga mu biro ebyo, okuzimba piramiidi. Era kyandi. . .Lwakuba, tetulina budde bumala kuddayo mabega kugiteerawo musingi kulaga ngeri piramiidi eyo gye yazimbibwamu okuyita mu bisenge eby'enjawulo ebirimu n'ebirala. Eyogera ne ku biseera eby'enkomerero mwe tuli kaakano. Kati bali mu kisenge kya kabaka, okusenziira ku bipimo. Naye piramiidi eyo teyatekebwaako jjinja littikkira. Era yazimbibwa nga yeekutte wamu, mu nkuba ya pulaani, manyanga mu—mu nzimba ey'amayinja. Okutuusa nti, ne. . .ka kabeere akagirita ak'omubiri omutini ennyo. . .Tebamanyi ngeri gye yazimbibwa, tebagitegeera, okubeera nti ka kabeere akagirita tekayinza kuyita wakati w'amayinja ago awandibadde omusenyu. Ate nga tewali musenyu. Naye nga gaggattiddwa wamu, buli limu ku linnaalyo.

73 Kati bwe kityo bwe kiba Kristo n'Ekkanisa bwe bafuuka omu. Wakati awo tewabaawo musenyu gwonna. Tewali kintu kyonna kiri wakati awo; wabula Katonda n'omuntu. Katonda, Kristo, n'omuntu.

74 Kaakati, naye, ejjinja eritikkira, tebalizuulanga. Mumanyi Ejjinja ly'e Scone lye balina mu Bungereza, kwe batongoleza bakabaka, manya o—okubatikkira, n'ebirala. Naye ejjinja ery'oku ntikko . . .

75 Tunuulira akapapula ka doola y'Amerika. Ojja kulaba oba . . . ku kapapula ka ddoola y'Amerika, ku ludda olumu, olwa kkono, kuliko akabonero k'envumbo y'Amerika, empungu nga erina . . . amafumu mu mukono gwayo, ate ku ludda olw'okubiri, kano bakayita akabonero "ka Amerika." Naye ku ludda olulala kuliko piramiidi ate, waggulu waayo, waliwo eriiso eddene, era wansi waalyo ne wabaawo ebigambo ebigamba nti, "Akabonero akakulu." Nga lwaki eyitibwa "Akabonero akakulu" mu ggwanga lino, ne batuuka n'okugiteeka waggulu w'akabonero k'eggwanga lyaffe? Mukiraba?

76 Ne bw'okola ki, era Katonda abaako n'engeri gy'akireetera okwogera. Mukiraba? Aleetera omwonoonyi okukyogerako. Aleetera eggwanga okugyogerako. Buli kintu kirina okumwogerako. Oba o—oyagala okukikkiriza oba nedda, Kisigala weekiri.

77 Kati, labayo, munda omwo mulimu eriiso, eriiso lya Katonda. Era olw'okuba ekitikkira tekyaliko, Akabonero Ak'oku ntikko, kubanga Kaagaanibwa, nga ye Mwana wa Katonda; Ejjinja ery'oku nsonda ery'ekizimbe, Akabonero Ak'oku ntikko aka piramiidi, na bino byonna. Kati—kati, ndi . . . Ssaagala ku . . .

78 Oluusi bagenda ne bakwata amaloboozi g'ebintu bino bye njogera, ne bituuka mu b'oluganda mu makanisa, mu makanisa amalala. Era bwe bibatuukako, oluusi ab'oluganda ne bafuna ekifaananyi ekikyamu, nti njogera bubu ku b'oluganda. Naye si bwe kiri. Si . . . Singa musobola okuwuliriza ne mutegeera bye njogera, mukiraba, sirina waaluganda yenna gwe njogerako bubu. Kubanga, ekyo tekisaanidde eri ab'oluganda, buli omu okwogera obubi ku munne. Tulina kwogera bulungi ku bannaffe, so si kuboogerako bubu.

79 Naye oluusi bwe njogera ku kibiina ekimu, nga Abapulesibeteriyani, oba Abamesodisiti, n'abalala, nga bagamba nti, "Mulaba, akirwanyisa." Ssirwanyisa waaluganda ali mu kibiina ekyo, oba mwannyinaffe akirimu. Naye mba nnwanyisa nkola eyo eyawulamu obwa sseruganda. Abaana ba Katonda ba nnyumba emu, so si—si ba bibinja bya njawulo.

80 Abamu ku bo ne batuuka n'okugamba mbu, "Nze ebyo tebinkwatako, kubanga bya Bapulesibeteriyani. Ate nze ndi Mumesodisiti." Mukiraba? Kati, tekirina kuba bwe kityo.

Mukiraba? Naye enkola y'ekibiina ekyo y'eggyawo omwoyo ogwo ogw'obwa sseruganda. Mukiraba?

<sup>81</sup> Kati, ekyo, kiringa bwe ntera okugamba nti, singa obeera osaabala omugga mu lyato ekkadde erirabika obubi, nga oyagala kugezaako kulikozesa okusaabala ebiyiriro, naye nga nkimanyi bulungi nti terijja kukola, kati, awo, nja kuba sikuleekaanira buleekanyizi, era nja kuba sikunyenya bunenya. Naye nja kuba ngezaako kukujja mu lyato eryo. Okiraba? Kubanga, eryato lye lijja okumenyeka, olwo—olwo—olwo ggwe osigale, awo wekka, mu mazzi. Kale—n'olwekyo mba sireekaanira—sireekaanira waaluganda ali mu lyato, naye ndeekaana eri ow'oluganda nga mmulaga ekigenda okubaawo.

<sup>82</sup> N'olwekyo, ebibiina bino byonna, abantu bye bakoze mu kufuba kwabwe biteekwa okumenyeka. Ky'ekyo. Balina okujja... Tulina okutuuka mu bumu, mu bwasseruganda. Ekyo kye kibaddenga ekigendererwa ky'obulamu bwange kwe kugezaako okugatta awamu so si kumenya kibiina, naye okubaleetera okuta endowooza zaabwe, babeere baaluganda eri buli Mukristaayo eyazaalibwa omulundi ogw'okubiri. Mukiraba? Ekyo, kye kigendererwa kyange. Awo we nnyimiridde, kale, kati, ekyo singa ab'oluganda basobola okukiraba. Nze. . .

<sup>83</sup> Bangi ku baganda baffe, ne mu ffe abakkiriza Enjiri Enzijuvo, tebakkiriza nti Ababaputisiti n'Abamesodisiti, n'Abaluzalaani n'abalala, nti nabo balina akakisa. Naye, kati, bayinza okuba abatuufu. Naye ekyo sikkiriziganya nakyo. Nzikiriza nti omulembe guno wano, Omulembe gwa Luther, mu mulembe guno *wano* ogwayitibwa, nzikiriza, gwali mulembe ogwa Saadi. Wamu n'Omulembe gwa Firaderufiya, ogw'Abamesodisiti. N'ogw'Abapentekoote, Omulembe gwa Lawodiikiya. Nzikiriza nti egyo mirembe egy'enjawulo. Era nti Katonda, mu buli gumu ku mirembe egyo, yaggyamu abalonde. Era mu ekyo, nga Abaebbulaniya 11 bwe wagamba, nti, "Bo awatali ffe tebaatuukirizibwa." Mukiraba? Naye kati Ekkansa ezze evaayo mu mirembe *gino*, nga buli mulundi ya bantu batono, okutuusa lw'Etuse mu mulembe gw'Abapentekoote.

<sup>84</sup> Kati, kino nkyogera, musobole okutegeera ekirooto kya mwannyinaffe kye yaloota. Era ekirooto kye kifaananira ddala ne bye mbadde njigirizaako.

<sup>85</sup> Kati mulabeeyo wano, kati, ebintu bino byonna Peetero Ekisooka olunyiriri olw'o 6 n'olwo 7 zikugamba, oku-... olw'okukkiriza kwo, ekyo kye kisooka. Kati, ntera okugamba nti abantu bagamba nga bwe balina embala zino nga tebazaalibwanga na mulundi gwa kubiri. Era ndabika nnakozesa enjogera enkalubo ne njamba nti, "Ekyo kiringa ekinyonyi ekidugavu okugezaako okweteekako ebyoya bya nnyonyi muzinge, ne kyefuula nnyonyi muzinge."

Tekisobola kuba nnyonyi muzinge. Wateekwa okubaawo ebyoya eby'obutonde ebimera nga biva munda mu kyo. Ebyoya ebyo birina kuva munda mu kyo.

<sup>86</sup> Era bulijjo, bulijjo babaddenga banvunaana olw'okukambuwalira bannyinaffe, olw'okusalako enviiri, n'okwesiiga eby'okwewunda mu maaso gaabwe, n'ebirala. Bulijjo banvunaana olw'okukambuwalira bannyinaffe. Tekiri—tekiri nti ebintu ebyo mbirinako ensonga yonna. Sigamba nti omukazi akola ebyo taba mukazi mulungi, oba nti aba malaaya oba ekintu nga ekyo. Ekyo si kye ntegeeza. Naye, kye ntegeeza kye kino, nti bwe yeeteekako ebintu ebikolerere bwe bityo ku ngulu, kiraga nti ne munda mu ye ajjuddemu bintu ebikolerere, mukiraba, nga ate asaanye kuba nga ajjuddemu Kristo. Kubanga, ky'oli ku ngulu bulijjo kyoleka ky'oli munda. "Mulibategeerera ku bibala byabwe." Mukiraba? Munda omwo mulina kubaamu Kristo, na kufaaayo eri Katonda, na kufaaayo ku bintu ebirala mu kifo ky'okufaaayo ku bintu ebikolerere amatiribona, era nga bwe mumanyi, n'ebisige by'amaaso ebya kiragala, n'endabika etali ya butonde, n'ebintu ebiringa ebyo. Ssibiwagira n'akatono, era sikkiriza nga ne Bayibuli ebiwagira, n'olwekyo njagala tusigale nga bwe tuli.

<sup>87</sup> Mwekkaanye, kati, bw'aba talina njala ku ngalo, n'ayagala okuziteekako; oba bw'aba talina mannyo, nga agaagala; oba nga tolina mukono, nga ogwagala; oba nga tolina nviiri, nga ozaagala; oba nga waliwo ekimu ku bintu bino ky'otalina, ekyo kirala. Naye bw'okuulamu amannyo go amalungi, mbu kubanga tegamasamasa nga bwe galina kuba, ekyo obeera okoze okoyamu. Enviiri zo bwe ziba mmyufu, n'oyagala enzirugavu, n'ogenda n'oziteekamu eddagala erizifuula enzirugavu, kubanga okyagala bwagazi; obeera okoze kikyamu. Weewaawo, nze bwe ntyo bwe ndowooza. Naye ekikulu. . . Tewali Kyawandiikibwa kyogera ku nsonga eyo. Okuggyako eky'okusalako enviiri, ekyo kirina Ekyawandiikibwa ekikyogerako, weewaawo, ebyo tulina bingi nnyo, kale kati, ekyo twagala tukakase nti ekyo kituufu.

<sup>88</sup> Kati, mwannyinaffe, bwe yaloota, yaloota nti yali. . . Kati, okusooka, yali atawaanyizibwa. "Kigasa ki okugenda mu maaso, nga tugezaako okulafuubana okuyita mu bulamu, nga Katonda atubanja okufuna Omwoyo Omutukuvu ate nga tetumulina?" Kati, ssirowooza nti. . .

<sup>89</sup> Kati bino bandiba nga babikwata ku lutambi. Naye bwe baba te. . . Bwe baba babikwata, kino kigenda eri kkanisa eno yokka. Mukiraba? Kati, singa wanaabaawo ow'oluganda yenna anaawulira kino, n'owulira eddobozi lyange, ow'oluganda, ku kino, jjukira kino nti, ndi mu kuyigiriza kkanisa yange. Ggwe ky'obanga okola, nga ekibiina kyo tekinnawuliriza, sooka wekkaanye e—entambi, era bw'oba nga toyagala kibiina kyo kuziwuliriza, tobakkiriza kuziwuliriza. Naye ngezaako kwogera eri ekibiina kino ekitono ekiri wano, o—Ow'oluganda Neville

nange, ku bw'Omwoyo Omutukuvu, kye tugezaako o—okusumba n'okuyigiriza.

<sup>90</sup> Kati, waliwo ebimu ku bintu bino bye muyinza obutakkiriziganya nabyo n'akatono. Kale bwe bibaamu, nga bwe ntera okwogera ku kulya enkoko ensiike nti, “Bw'oluma eggumba, leka kusuula nkoko yonna. Suula ggumba lyokka.” Kale bulijjo mukolenga bwe mutyo. “Bw'oba obadde olya paayi ey'ensaali, n'oluma akasigo, paayi togisuula eri yonna. Akasigo k'osuula.” Kati naawe kola ekintu kye kimu nga bw'owuliriza Kino.

<sup>91</sup> Kati, nzi—nzikiriza nti—nti e—ensonga lwaki waliwo okutabulwatabulwa kungi nnyo leero, ku Mwoyo Omutukuvu, eri lwakuba tayigiriziddwa mu ngeri ntuufu. Nzikiriza nti okubatizibwa kuyigirizibwa...ne bagamba bugambi nti “okubatizibwa.”

<sup>92</sup> Naye ekyo kiba nga bw'oyinza okugamba nti “emmotoka.” Naye kati nnina ba makanika bangi mu kkanisa eno, era ssirina n'ekimu kye mmanyi ku bikwata ku mmotoka. Kale bwe nkola ensobi, ab'oluganda, ndi. . . Mujjukire nti, ssiri makanika. Wateekwa okubaawo zi koyiro, ne zi pulaaga, ne zi swiici ne zi valuvu, n'ebirala, ebikola emmotoka.

<sup>93</sup> Mu ngeri y'emu bw'oyogera ku kubatizibwa kw'Omwoyo Omutukuvu, waliwo bingi ebigendera awamu n'Ekyo. Huh? Mukiraba? Waliwo bingi ebigendera awamu n'Ekyo. Kati kiikino kye ndwoowa okuba nti Katonda ky'akakasa: akakasa nti Omwoyo Omutukuvu ali wano. Mukiraba?

<sup>94</sup> Kati, Peetero yagamba nti, ekisooka, “Kukkiriza.” Kati mukyokkaanye n'obwegendereza. Kino tugenda kukiyigiriza mu ddakiika ntono nnyo ddala. Okukkiriza, kati, kw'otandika nakwo. Ku kukkiriza kwo, oyongereko obulungi; ku bulungi bwo, okutegeera; ku kutegeera kwo, okwefuga; ku kwefuga kwo okugumiikiriza; ku kugumiikiriza kwo, okutya Katonda; ku kutya Katonda kwo, okwagala ab'oluganda, okuba n'ekisa eri ab'oluganda; oluvannyuma oyongereko okwagala. Ate buli muntu yenna akimanyi bulungi nti okwagala ye Katonda. “Katonda kwagala.” Mukiraba?

<sup>95</sup> Kaakati, okuva awo, bwe tuva ku kino, kati ate tukisimbe mu mirembe omusanvu egy'ekkanisa. Katonda azze azimbira, Kristo Omugole, okuyita mu mirembe omusanvu egy'ekkanisa; okuyita mu mulembe gwa Firaderufiya, n'ogwa Suwatira, n'ogwa Perugamo, n'ogwa Sumuna, n'ogwa Efeeso. Omulembe gw'ekkanisa, Yesu we yagambira nti, “Omugole omusajja bwe—bwe yajja mu kisisimuka ekisooka manya mu kisisimuka eky'omusanvu, embeerera zino zonna zaazuukuka.” Zonna zaazuukuka. Zaazuukuka, embeerera eza Efeeso, Sumuna, Perugaamo, Suwatira, Saadi, Firaderufiya, ne Lawodiikiya. Ekyo mwali mukyokkaanyizza? Gwali mulembe ogw'omusanvu,



mwe Yajjira n'azuukusa embeerera ezo ezaali zeebase. Ekyo kibaggyayo bonna bonna okuviira ddala emabega eri okutuuka wano. Mukiraba? Kubanga, mu kino, okuyita mu myaka egizze gibaawo, mu mireembe egy'enjawulo, Azze azimba Omugole, azadde Omugole, azaalidde Kristo Omugole ku nsi. Era mu ngeri y'emu gy'Azaddemu Omugole ono, gy'Azaddemu n'abantu ssekinnoomu.

<sup>96</sup> Kaakati nteekawo omusingi guno, musobole okutegeera ekirooto kya mwannyinaffe bwe kinaabategezebwa.

<sup>97</sup> Kati, ebintu bino mu buli ngeri biteekwa okuba mu Mukristaayo nga Omwoyo Omutukuvu tannamusibako nvumbo, nga kino tekinnakka kutuula ku ntikko kukifuula kintu ekijjuvu.

<sup>98</sup> Kaakati, ka tugende ku kirooto kya mwannyinaffe kati. Yali mweraliikirivu nga tamanyi oba alina Omwoyo Omutukuvu oba tamulina, bwe yagalamira ku ntebe efunyibwa n'efuuka ekitanda omwami we kwe yali atudde nga asoma amawulire. Kati alina abaana abato, nga be nnina, era bulijjo babeera baleekaana n'ebirala byonna. Kale kati, mu kino, otulo twamutwala ne yeebaka okumala eddakiika nga kkumi, oba kkumi na ttaano. N'aloota. Naye ekirooto ekyo kyamulema okutegeera, oba okufuna amakulu gaakyo, kyenkana, kati wayiseewo omwaka mulamba, okutuusa Obubaka buno lwe bwayigirizibwa. Era, bwe nnali mbuyigiriza, awo n'alyoka abijjukira. Kati yaloota nti yali nga asaba.

<sup>99</sup> Mu kusooka, bwe yali tannaloota, yali atambulatabwala awo, nga bw'akunya engalo ze, bwe yeebuuzza munda mu ye nti, "Mukama, ddala nnafunu Omwoyo Omutukuvu? Osobola okunkakasa. Abamu bagamba mbu, 'Kubanga nna—nnaleekaana.' Ate abamu ne bagamba mbu, 'Kubanga nnayogera mu nnimi.' Ate ebyo byonna tubikkiririzaamu. Naye ddala mmulina?"

<sup>100</sup> Nzikiririza mu bintu ebyo byonna, embala ezo, okwogera mu nnimi, n'okuleekaana, n'ebintu ebya buli ngeri ebibaawo. Byonna byonna mbikkiririzaamu. Naye bwe bibaawo nga *Kino* tekiriwo, wabaawo ekikyamu. Mukiraba? Kati, mulaba, mulaba, o—obeera olina kisosonkole busosonkole. Mwekkaanye.

<sup>101</sup> Kale kyali kimweraliikiriza, kye yava agalamira awo bukiika ku ntebe efunyibwa n'efuuka ekitanda omwami we kwe yali atudde nga asoma, otulo ne tumutwala.

<sup>102</sup> N'aloota nga ali waggulu ku lusozi. Era mu lusozi luno, ekisinga... olupapula olwo ssirulina wano, naye kirabika kiri bwe kiti. Yaloota nga alaba o—olwazi olwakulanga ekibokisi, nga kiringa—nga kiringa o—olwazi olwakulanga ekibokisi, nga lutudde waggulu ku ntikko y'olusozi. Nga n'omwami we ali mabega we. N'alaba omusajja omunene nga ayimiridde awo, nga ayambadde engoye ezikolerwamu emirimu, nga afunyizza emikono gy'olugoye lwe, nga asena amazzi agasingayo

obulongoofu ge yali alabye, nga agayiwa mu bokisi eno, bookisi eno ey'olwazi eyali waggulu ku ntikko y'olusozi. Naye nga bookisi amazzi gagiyitamu buyisi. Ekyavaamu ne gakulukuta ne gagiyitamu, ne gasiikuula kasasiro yenna n'obuti obwalimu, na buli kimu ekyalimu, ne gabisiikuula ne bibooga ne bikulukuta nga bwe bikka wansi okuva ku lusozi. Ne bikulukuta ne biyiika ku bigere bye, ne yeesanga nga ayimiridde mu bintu ebyo ebyali bikulukuta, naye tebyamukwatirako.

<sup>103</sup> Kye—kye yava abuuza lwaki bokisi tesobodde kubiwanirira, omusajja n'amugamba nti, "Ago si mazzi. Oyo Mwoyo Omutukuvu, era," n'agamba nti, "tewali kiyinza kumuwanirira." N'agamba nti, omusajja kye yava addayo n'afuna bbaketi endala ennene nga ejjudde omubisi gw'enjuki, n'ayiwa omubisi gw'enjuki mu bokisi eri, n'agamba nti, "Kati guno ggwo tegugenda kuyitamu." Naye mwannyinaffe ye yali alowooza nti bokisi, yali bokisi ya lwazi, nti yali egenda kwabika omubisi gw'enjuki guyiike, naye teyayabika. Era oluvannyuma yeekwata wamu n'eguwanirira.

<sup>104</sup> Mwannyinaffe kye yava akyuka n'aserengeta nga bw'ava ku lusozi. Bwe yaserengeta n'ava ku lusozi, kye yava ayimirira ku ntobo y'olusozi n'akyuka n'atunula emabega. N'alaba ensulo ttaano ez'amazzi gano amalongoofu, agatukula be ttukuttuku, nga tegooneddwa bintu biri bye gaali gayiseemu, nga gakyali malongoofu era mayonjo, nga zikulukuta ku misinde emiyitirivu. Ekyavaamu ne zikendeeza ku misinde. Ate, ne zigenda nga kyenkana zonna ziggwerera, era yali yeebuuza oba nga zinaatuuka ku ntobo y'olusozi, nga zikyali nsulo taano. N'azuukuka.

<sup>105</sup> Ndwooza kyenkana ekirooto ekyo bwe kityo bwe kyali, si bwe kiri, Mwannyinaffe Shepherd?

<sup>106</sup> Kati, nnali nnaakakwata nti ebbaluwa okugisumulula, mba sinnagisoma, ne ndaba ekirooto kye.

<sup>107</sup> Ebirooto bwe bityo bwe bivvunulwa. Kati, bangi ku mmwe muzzenga gyendi nga mulina ebirooto, ne—ne mubaako bye munḡamba ebikwata ku birooto. Naye ne mbagamba nti, "Lindako katono. Ekirooto ekyo tokimazeeyo." Mukiraba? Ne nzirayo emabega ne nkirambulula kyonna nga bwe kyali. Kati bw'oba tosobola kunnyonnyola kye waloose, onaayinza otya okumanya amakulu gaakyo oba nga matuufu oba si matuufu? Mukiraba? Oteekwa, oteekwa okulaba ekirooto. Okwolesebwa kulina okulaga ekirooto. Kati bw'olaba ekirooto omuntu ky'aba yaloose, n'okimugamba nga tannakikugamba, obeera omanyi amakulu gaakyo.

<sup>108</sup> Ekyo, nzikiriza ne mu Byawandiikibwa, mwekiri, ne Danyeri, lumu kyamutuukako. Si bwe kyali? Yagamba... Weewaawo. Nzikiriza ekyo kye kyanzijira mu kiseera ekyo. Mukiraba?

109 Naye bulijjo olina okulaba ekirooto, kati, okuvvuunulwa bwe kuba nga kutuufu. Omuntu bw'atandika okukubuulira ekirooto kye yaloose, osobola n'okumuyimiriza, n'omugamba nti, "Weesirikire. Kyabadde *bwe kiti*. Era mwabaddemu *kino-nakino*, ne *bwe kiti ne bwe kiti*."

Awo nga omugamba nti, "Ky'ekyo kyennyini." Okiraba?

110 Luli, waaliwo omusajja, eyali agezaako okumbuulira ekirooto kye yaloose. N'agamba nti, "Kale," n'agamba. . .

Kye nnava mmubuuza nti, "Naye kaakati, ow'oluganda, ekitundu kiri ekirala oleseeyo kyaki?"

N'ambuuza nti, "Ate kitundu ki?"

111 Ne mmugamba nti, "Waloose nga okasuka ejjinja mu bbanga, ne ndikuba essasi ne livaako obupapajjo ne bunsammukira mu liiso."

112 N'agamba nti, "Ddala bwe kityo bwe kyali, Ow'oluganda Branham." Era, akatundu akasembayo baakaggyemu lunaku lwa jjo. Uh-huh.

113 N'olwekyo kiikyo. Mukiraba? Mukiraba? Lwaki? Mmwe temuggyayo mazima gonna, naye, olaba, lubeerera Abikkula eby'emabega, era, n'akubuulira ekirooto kyo, kye waloose. Olwo n'otegeera nti kituufu.

114 Kati, gano ge makulu g'ekirooto kye. Yali atawaanyizibwa ku bikwata ku Mwoyo Omutukuvu. Kati, kyamutawaanya nnyo okutuusa okuba nti ekibookisi kye yalaba ku ntikko y'olusozi, lwali lwazi. Ekibokisi ky'olwazi kitegeeza, *lwazi*, "okwatula." Kati, nga Yesu bwe yayogera mu Byawandiikibwa. Yagamba nti, Peetero yamubuuza. . . "Ani," Yesu yabuuza nti, "Nze, Omwana w'omuntu, abantu bampita, ani?"

"Omu n'agamba ye Ggwe 'Eriya,' omulala 'Musa,' n'ebirala."

Kye Yava ababuuza nti, "Naye mmwe mumpita Ani?"

N'amugamba nti, "Ggwe Kristo, Omwana wa Katonda omulamu."

115 Kati, abantu abamu bagamba mbu, ekereziya Katolika egamba, ekereziya Katolika ey'e Rooma egamba, mbu okwa- . . . "Olwazi olwo, Yesu kwe yagamba nti, 'Ku lwazi luno kwe Ndizimba Ekkanisa Yange, n'emiryango gy'emagombe tegirigiyinza.'" Bagamba mbu, "Yali ategeeza ku Peetero. Era mbu Peetero ye yali olwazi olwo, kubanga *Peetero* litegeeza 'akayinja.' 'Ku kayinja kano kwe Ndizimba Ekkanisa Yange.'" Era ku Peetero, abo, abagoberera enkola y'abatume ey'ensikirano, okwo kwe baazimba ekkanisa.

116 Ate ekkanisa ey'enzikiriza ezaawakanya Obukatuliki zo ne zigamba nti, "Ekyo kikyamu. Nti, Ekkanisa yagizimba ku Ye mwene."

117 Kati, ssaagala bwagazi butakkiriziganya nabo, naye, nze, mu kulaba kwange, bombi bakyamu. Kubanga, teyagizimba ku Peetero, so nga era teyagyezimbako nga Ye, naye yazimbibwa ku kubikkulirwa kwa Peetero kwe yafuna okw'ekyo Yesu kye Yali. Mukiraba?

“Abantu bagamba, Nze Omwana w'omuntu nze ani?”

“Ggwe Kristo, Omwana wa Katonda omulamu.”

118 “Olina omukisa, ggwe Simooni, mutabani wa Yona. Kino omubiri n'omusaayi si bye bikikubikkulidde,” si ttendekero lya bya ddiini, olaba, “wabula Kitange ali mu Ggulu y'akikubikkulidde. Ggwe Peetero. Ku lwazi luno olw'okwatula, ku kubikkulirwa kuno, kwe Ndizimba Ekkkanisa Yange.”

119 Era bwe kityo bwe kibaddenga, buli mulembe gwa kkanisa gubaddenga n'okwatula okwo okw'olwazi, okutuukira ddala ku kwatula kuno okw'olwazi okwa Lawodiikiya.

120 Era, kati, ekkkanisa tosobola kugifuula ntukuvu. Teriyo kintu kiyitibwa kkanisa entukuvu oba ekibiina ekigunje kyonna ekitukuvu. Omwoyo Omutukuvu asobola okubuulirwa mu yo, naye era osangamu abalungi n'ababi, ba kyewaggula, abatafaayo, n'abalala bonna. N'olwekyo tasobola kunyewera mu kibiina ekigunje. Temuyinza kugamba mbu, “Ffe tumulina. Abalala bonna tekuli amulina.” Nedda, ssebo. Omwoyo Omutukuvu afukibwa ku bantu ssekinnoomu. Abeera muntu ssekinnoomu.

121 Kale, n'olwekyo, olwazi, Ekkkanisa eno ey'abapentekoote ab'ennaku ez'oluvannyuma efunye Omwoyo Omutukuvu, nga bwe baamufuna ku ntandikwa. Okuyita mu mirembe gyonna, bazze bafuna Omwoyo Omutukuvu, naye si mu kigera mwe bamufunira leero, kubanga kino kwe kuzzibwaawo kwa kiri ekyasooka. Nga bwe tuyiga ku bikondo by'ettabaaza, Alufa ne Omega, nga bwe baakolezanga ettabaaza esooka; ekitangaala kigenda kyeyongera waggulu bwe kyeyongera waggulu, ne kizimeera; ate ne kiddamu ne kikomawo nate. Mukiraba? Ekisooka n'ekisembayo, n'ebirala.

122 Kaakati, naye mu mulembe gw'ekkanisa guno, Obubaka bufukumulwa mu kkanisa. Naye ekkkanisa, nga yo, yennyini, okutwaliza awamu nga . . .

123 Ka tukozeze, ekkunjaanairo lino. (Y'ekkanisa ya mwannyinaffe mw'akunjaanira.) Ekkunjaanairo lino si kkunjaanairo lya Mwoyo Mutukuvu. Teri kintu kya ngeri eyo. Abantu ssekinnoomu abajja mu kkanisa eno abo ge makunjaanairo g'Omwoyo Omutukuvu. Abo ge makunjaanairo Omwoyo Omutukuvu mw'atuula, naye si kkanisa yonna awamu, nga ekibiina. N'olwekyo, Akulukuta n'ayitamuu.

124 Naye, ate, kati ate omusajja ono eyali ayiwa amazzi, omubaka eri ekkkanisa, eyali ayiwa Obubaka mu kkanisa,

kati amazzi gaali gakola ki? Gaali gookya kasasiro yenna eyalimu. Ekyo Omwoyo Omutukuvu ky'akola, abyokya byonna n'abiggyamu, kati.

<sup>125</sup> Kati, omubisi gw'enjuki gwali gukiikirira kwagala kwa baaluganda, okubeera n'ekisa eri ab'oluganda, nga gwe mulembe guno. Nnaakamala okukiyigirizaako, mukiraba, eky'okuba n'ekisa eri ab'oluganda, omulembe mwe tuli kaakano.

<sup>126</sup> Kati, oyinza okugamba nti, "Labayo, nze—nze—nze bannange Ow'oluganda Neville simwagalirako ddala n'akatono." Oba, "Ow'oluganda Jones simwagalirako ddala. Ow'oluganda *Gundi* ssimwagala," n'ekintu bwe kityo. Naye leka wabeewo ekimutuukako, ow'oluganda, owulira nga omenyese omutima. Owulira nga kijula kukutta. Mukiraba? Tusobola okuba n'ekisa eri ab'oluganda n'okulumirirwa abalala. Mukiraba? Naye okukukuuma mu kibiina ky'abantu. . .

<sup>127</sup> Lwaki ofaayo eri ow'oluganda oyo? Kubanga omenyenga naye omugaati wano ku wolutaali, nga bw'ogenda okukola akawungeezi ka leero. Okunŋaana naye. Omukuttenga mu ngalo. Osinza naye. Muganda wo. Weewaawo ayinza okubaako ne ky'akola mu mubiri, ky'oyinza obutakkiriziganya naky'o, kubanga owulira wandyagadde, (weewaawo ky'otateekwa kukola), naye owulira nga oyagala okumwesalako katono. Naye ku ntobo y'omutima gwo, ssinga wabaawo ekintu kyonna ekituuka ku w'oluganda oyo, owulira nga kijula okukutta, oba mwannyinaffe oyo.

<sup>128</sup> Ndi—ndi musajja mukadde. Lumu nnaliko omuto, naye kati nkaddiye. Ekyo nzize nkiraba, okuyita mu mirembe, nga bakikola. Ogenda n'owulira abantu nga bagamba nti, "Ssikyayagala kukolagana naye." Naye bwe wabaawo ekimutuukako, awulira nga kijula okumutta. Ate nga adda mu kwejjusa nga agamba nti, "Ai Katonda, nnalese muganda wange omwagalwa n'agenda, nga tetutabaganye." Mukiraba? Mukiraba? Mukiraba? Kwagala kwa baaluganda. Kulabika nga okutaakwate, naye kukwata. Mubisi gwa njuki, gukwata.

<sup>129</sup> Kaakati, kyamusukkako nnyo okutuusa nti yavaayo, n'akkirira akasozi, okutuuka ku ntobo y'akasozi, kati, amazzi gano ag'omuwendo gaali gakuukuta okuva mu busozi, mu nsulo taano. Kati, ttaano gwe muwendo ogw'ekisa; Y-e-s-u, o-k-u-k-k-i-r-i-z-a, e-k-i-s-a. [Ebigambo bino bya nnyukuta ttaano mu Lungereza—Omuuvv.] Mukiraba? Ttaano gwe muwendo ogw'ekisa. Ensulo ttaano zaali zikulukuta nga ziva waggulu eno nga ziyiwa mu kibanvu, okuyita mu bino *wano*.

<sup>130</sup> Buli gumu ku mirembe gino gwalina okwatula okwo okw'olwazi. Abatukuvu beebase, balindirira, balindirira, balindirira, mukiraba, okutuuka ku mulembe guno. Naye mangu ddala Omwoyo Omutukuvu, nga afukibwa okuva mu Kristo, ajja kujja ateeke envumbo ku Kkanisa. Era ekyo bwe

kinaabaawo Ekkansa eja kukwakkulibwa. Eja kuba kintu kya Katonda ekigattiddwa awamu, Omugole wa Kristo, anaabeera Omutwe gwa byonna. Kati mungoberera? [Ekibiina kiddamu nti, “Amiina.”—Omutwe.]

<sup>131</sup> Kati, mwannyinaffe yali yeewuunya. Kati, mu kirooto kye, yali yeewuunya, “Oba nga ensulo eno entono . . . Oba nga ensulo eno entono enaatuuka ku ntobo?” Mukiraba? Yali egenda ekalira. Kati, nga bwe kiri nti, ye kennyini. Kati kino kye njagala mutegeere kaakano. Ye kennyini yali yeebuuzza. Oba nga “alina Omwoyo Omutukuvu”?

<sup>132</sup> Kati, kino nnali nneewala okukyogera, ennaku ntono eziyise, nga ndowooza nti ekkansa enaaba ya mwoyo ekimala okukitegeera. Kati ndowooza mu kaseera kano kyandibadde kirungi olutambi luno ne nsooka nduggyako, naye kubanga kino ssaagala kifulumbe kugenda mu baaluganda. Naye osobola okwogera mu nnimi, osobola okuleekaana, osobola okuzina amazina, osobola okugoba emizimu, osobola okukola buli kimu kyonna ky’oyagala, naye era n’osigala nga tolina Mwoyo Mutukuvu.

<sup>133</sup> Abayigirizwa bali tebaakomawo, nga basanyuka nga baleekaana kubanga ddayimooni zaabagondera, naye Yesu . . . nga mu makkati gaabwe mwennyini mwalimu Yuda?

<sup>134</sup> Yesu teyagamba nti, “Ku lunaku luli,” bw’Alijja, nti, “bangi balijja gye Ndi ne banjamba nti, ‘Mukama wange, ssaagoba emizimu, era ssaakola emirimu egy’ekitalo mu Linnya Lyo?’ Nange Ndigamba nti, ‘Muve wendi, mmwe abaakola eby’obujeemu. Ssibamanyangako.’” Ebintu ebyo si bye bikakasa nti olina Omwoyo Omutukuvu.

“Mulibategeerera ku bibala byabwe.”

<sup>135</sup> Kati oyinza okumbuuza nti, “Ow’oluganda Branham, tusaanye, okwogera mu nnimi?” Mazima ddala. Ebyo birabo bya Katonda. Naye ebirabo bya Katonda ebyo, bwe bitabaamu mbala zino, bifuuka ekyesittaza eri atakkiriza. Katonda tabikkiriza.

<sup>136</sup> *Bino* bye birina okusooka. N’olwekyo bw’obeera n’okukkiriza, obulungi, okutegeera, okwefuga, obugumiikiriza, okutya Katonda, n’okwagala ab’oluganda, olwo nga Omwoyo Omutukuvu akka nga akuteekako envumbo nga ekintu ekiri awamu ekiwedde okukolwako, mu ngeri y’emu nga bw’Ateeka envumbo ku mirembe gy’ekkanisa nga ekintu ekiri awamu ekiwedde okukolwako. Engeri gy’Akolamu Omugole We y’engeri gy’Akolamu omuntu ssekinnoomu; nga bonna bakolebwa mu kintu kye kimu, nga Kaawa bwe yaggyibwa mu Adamu, mu lumu ku mbiriizi ze. *Bino* by’ebintu by’oteekwa okusooka okufuna. Toyinza kubigeegenya. Toyinza kubikopperera. Biteekwa kuba nga Katonda y’abikuwadde era nga Katonda y’abizzadde mu ggwe. Okubikopperera kuleeta buleesi mivuyo.

137 Kiringa bwe nnagamba nti. Osobola okukubamu akafaananyi nga akakubampanga katudde awo keesonsesemu ebyoya by'ejjiba mu biwaawaatiro byako, nga bwe kagamba mbu, "Olaba, ndi jjiba!" Tekaba jjiba. Kaba kakubampanga, nsega. Osobola okukubamu akafaananyi ekinyonyi ekiddugavu nga kirina ebyoya bya nnyonyimuzinge mu biwawaatiro byakyo, nga kigamba nti, "Ondaba!"? Ebyoya ebyo kiba kibisonsesemu busonsesi.

138 Naye birina kuva munda ne birabisibwa ku ngulu, ne bibala Obukristaayo; nga ye Katonda, ku bw'amaanyi ag'Omwoyo Omutukuvu!

139 Ebigere bya mwannyinaffe byatoba bwe yatuuka ku ntobo. Fenna tumanyi bulungi nga Mwannyinaffe Shepherd bw'ali omuntu alina okwagala. Ennyumba ye lubeerera eba nzigule. Ye wamu n'owoluganda, si nsonga oba kireereese, oba masiikiini, oba kiki kyonna ky'ali, bajja kumuliisa, era bakole buli kimu kyonna okumuyamba okumulabirira. Ha! Ekyo Katonda yakikkiriza, ekitundu kye eky'omusingi.

140 Naye wano we wali, kati, mufune eky'okuyiga kino. Guno gwe mutawaana gwa—gwa...Olwa kino leka nguzzeeko. Guno gwe mutawaana gw'Ekkunḡaaniro lya Branham. Mulaba, waliwo okukkiriza kwa bika bibiri eby'enjawulo. Waliwo obulungi bwa bika bibiri eby'enjawulo, nga bwe nnakinnyonnyola luli. Okutegeera kwa bika bibiri eby'enjawulo. Okwefuga kwa bika bibiri eby'enjawulo.

141 Omuntu omu ayinza okulowooza nti okuwera, kwe kwali kubaziya. Ekyo si ky'ekika ky'okwefuga Katonda kw'ayogerako. Ayogera ku busungu obwo obutaliimu kutya Katonda, obutafugika bw'olina, n'ebigwa mu kkowe eryo, okwanukuza obusungu, okuyomba.

142 Bw'oyogera ku bugumiikiriza, n'ebirala, waliwo ebibigeegenya, ebibyefaananyiriza; waliwo okukkiriza okw'obuntu; waliwo obulungi obw'obuntu. Waliwo okwefuga okw'obuntu. Ebintu bino byonna omuntu azaalibwa nabyo.

143 N'ekitundu ekisinga obunene eky'okukkiriza kwaffe kuba kukkiriza okw'omu bwongo. Okuyita mu kuwulira Ekigambo, kituletera okutegeera Katonda mu bwongo.

144 Naye Kino, bwe kiva Waggulu, o, ow'oluganda, singa Kimala ne kikka ku *bino*, wabaawo okukkiriza okw'omwoyo okw'obwokatonda. Kati okukkiriza okwo kukola ki? Okukkiriza okwo kutegeera Kigambo kyokka. Ekintu ekirala kyonna ne bwe kigamba ki, kwo kutegeera Kigambo, kubanga, "Ku lubereberye waaliwo Kigambo, Kigambo n'aba awali Katonda, Kigambo n'aba Katonda." Era Kigambo akyali Katonda. "Era Kigambo n'ayambala omubiri n'abeerako gye tuli." N'olwekyo Ekigambo Kyennyini bwe kyefukumula mu kukkiriza kwaffe, okukkiriza kwaffe okw'obwongo kufuuka okubikkulirwa okw'omwoyo.

<sup>145</sup> “Ne ku musingi guno kwe Ndizimba Ekkanisa Yange.” Mukiraba? Si ku kutegeera okw’obwongo okw’okwegatta ku kkanisa, okutegeera obutegeezi Ekigambo mu bwongo; naye ku kubikkulirwa, nga ensulo ezo ez’ekisa zifukumuddwa mu kukkiriza okwo okw’obwongo kw’olina. Kati, okuva awo, ku kubikkulirwa kuno okw’omwoyo kwe, “Ndizimba Ekkanisa Yange, n’emiryango gy’emagombe tegirigiyanza.” Mukiraba? Ekyo kiraga nti gigirwanyisa, naye tegirigiyanza. Ha, nga kirungi nnyo! Kati mulabeeyo okukkiriza. Ensulo zino ettaano . . .

Wano nnabaddewo n’akatundu k’ennoni, naye alabika teyakaleese.

<sup>146</sup> Naye ensulo ettaano ze mulaba zikkirira okuyita wano, ze zinyweza *binu* ne bibeera wamu. Omwoyo Mutukuvu ye yakola ekkanisa ya Efeeso. Omwoyo Mutukuvu ye yazaala ekkanisa ya Sumuna. Mwoyo Mutukuvu ye yawa ekkanisa ya Perugamo, n’ekkanisa ya Suwatira, mu Mirembe egy’Ekizikiza. Omwoyo Mutukuvu y’azze azimba Omugole oyo, Omulonde oyo eyaggyibwa mu nkola z’ebibiina eby’obuntu byonna okuyita mu mirembe egy’enjawulo, bw’atyo. Waliwo Abalonde, Omugole wa Yesu Kristo eyateekerwateekerwa, oyo Omwoyo Omutukuvu gw’ayiseeyo Omulonde. Era abaddenga Mwoyo Mutukuvu mu mulembe *guno*, mu mulembe *ogwo*, mu mulembe *ogwo*, n’*ogwo*, n’*ogwo*, n’*ogwo*, okutuuka ku ntikko, abadde Mwoyo Mutukuvu.

<sup>147</sup> Era kati ne mu bantu ssekinnoomu, embala zino n’ebintu ebirala, omuli okutegeera n’okwefuga, bwe bigattibwa ku kukkiriza kwaffe. Olwo Ejjinja ery’okuntikko bwe lijja, Omwoyo Omutukuvu abigatta wamu. Okwo kwe kubatizibwa kw’Omwoyo Omutukuvu. Eyo y’ensonga lwaki leero kwa bbula nnyo.

<sup>148</sup> Leka ndabe wano, nninawo wano bye nnawandiise. Leka tulabe. Nnina ekifaananyi kye nnakubye, eky’ekirooto kye. Mukiraba? Temusobola kukiraba bulungi nga muli eyo gye muli.

<sup>149</sup> Kati, kiki ekijja nga kiva Mwoyo Omutukuvu? Kati awo aba Ajja kukuwa, okukkiriza okusukkulumye ku kwa bulijjo, okukkiriza okw’omwoyo, kwe kuli *wano* ku ntobo. Kati okukkiriza okwo okw’omwoyo kutegeera Kigambo kyokka. Omuntu omulala yenna ne bw’ayogera kiki kyonna, teki—tekirina kye kigasa. Okwo kumanyi Kigambo kyokka. Oli bw’agamba mbu, “Ennaku z’ebyamagero zaayita.” Okukkiriza okwo kumanyi Kigambo kyokka. Oli bw’agamba mbu, “Eby’okubatizibwa n’Omwoyo Omutukuvu tebiriiyo.” Okukkiriza okwo kutegeera Kigambo kyokka. Okwo kwe kukkiriza okwa nnamaddala, okukkiriza okw’omwoyo, mukiraba. Bwe kiri. Mukiraba? Kumanyi Kigambo kyokka.

<sup>150</sup> Kaakati, ekyo kye kibadde ekisooka. Ekisooka, okujja gy’oli, eri okukkiriza kwo okw’obwongo okuba wano,



Omwoyo oyo Omutukuvu ajja n'ayingira mu kukkiriza kwo okw'obwongo, n'akufuula okukkiriza okw'omwoyo. Ate okukkiriza okw'omwoyo kutegeera Kigambo kyokka.

<sup>151</sup> Kaakati, n'eky'okubiri, n'eky'okusatu. Kati awo ojja kuba n'omwoyo, ojja kuba ofunye Omwoyo Omutukuvu, era ajja kussa envumbo ku bintu *binu* byonna abikusibiremu, nga Omwoyo oyo Omutukuvu bw'abikka ku *kino*. Okuva ku kukkiriza kwo, okutuuka ku Mwoyo Omutukuvu, akusibire munda wamu ne Kristo. Olwo mufuuke Omu. Amiina. (Ekintu kino kinzigirewo wano; kikumenyera bwereere.) Mufuuka omu. Okiraba, ggwe ne Kristo ne mubeera wamu. "Ku lunaku luli mulitegeera nga Nze ndi mu Kitange, ne Kitange ali mu Nze; Nange mu mmwe, nammwe mu Nze." Mukiraba? Kati ekyo kiba kintu kya Mukama Katonda ekiri awamu ekiwedde okukolwako.

<sup>152</sup> Kaakati, era ekyo bwe kibaawo baba bakakasiddwa era ne bateekebwa mu bifo byabwe. Ekiseera ekyo bwe kituuka, bafuuka abaana ba Katonda ab'obulenzi n'ab'obuwala abakakasiddwa.

<sup>153</sup> Mujjukira, mu Kitabo kya Matayo, essuula ey'e 17, olunyiriri olusooka okutuuka ku lwo 5, nga Yesu ali ku Lusozi Olw'okufuusibwa?

<sup>154</sup> Mwawulira obubaka obugamba nti *Mumuwulire*. Obubaka bwe nnabuulira, gye buvuddeko wano, omwaka nga gumu emabega, bwe nnabuulira, obwakyaka ennyo, *Mumuwulire*. Okutuuzibwa kw'omwana mu kifo kye nga omwana, ne mu Abaefeso 1:5, "Katonda bwe yatwawula edda okumufuukira abaana."

<sup>155</sup> Mulaba, mu maka, omwana ow'obulenzi bwe yazaalibwanga, yabanga mwana mu kiseera ekyo. Naye omwana oyo yabanga n'abakuza. Kati omwana oyo bw'ateeyisanga nga— nga omwana agwanidde, teyafuukanga musika. Naye bwe yakakasanga okuba omutabani agwanidde, era omwana anaagonderanga kitaawe, awo omwana oyo yatongozebwanga, oba yatuuzibwanga mu kifo kye w'alina okuba. Yafuulibwanga omusika w'ebyo kitaawe bye yabanga nabyo.

<sup>156</sup> Era ekyo Katonda kye yali akola ku Lusozi Olw'okufuusibwa. Bwe Yatwala Omwana We Yennyini, nga Amaze okukakasibwa nti ye Mwana agwanidde, olaba, era nga awangudde ebikemo byonna, Yamutwala waggulu ku Lusozi Olw'okufuusibwa n'amusiikiriza.

<sup>157</sup> Omanyi, mu Ndagaano Enkadde, baatwalanga omwana, ne bamwambaza ekyambalo ekirungi, ekineekaaneka, ne bamuyimiriza mu maaso g'abantu. Ne bakola omukolo ogw'okumuteeka mu kifo kye, manyanga kye tuyita okutongozebwa. Ndowooza, mu Baggalatiya Pawulo akyogerako nga okutongozebwa nga abaana ab'obulenzi abatongozeddwa. Kaakati, naye, okuteeka omwana mu kifo kye, abaweereza bajja

kukitegeera, n'ab'omwoyo, n'abasomi ba Bayibuli, eky'okuteeka omwana ono mu kifo kye. Nga kitegeeza, nti omwana yabanga mwana bwe yazaalibwanga.

<sup>158</sup> Awo abantu baffe Abapentekoote we baakolera ensobi. Bwe tuzaalibwa mu maka, nga tuzaalibwa Omwoyo Omutukuvu, ekyo kituufu, naye ate kitukakatako okuba abaana abagwanidde, nga tukuzibwa Omukuza omutuufu. Mukiraba?

<sup>159</sup> Kati, omusajja, edda eri mu ndagaano enkadde, bwe yalowoozanga ku mwana we, n'ayagala aveemu omwana ow'obuvunaanyizibwa, yafunanga omukuza asingayo obulungi gw'asobola okufuna, omusomesa asingayo obulungi, kuba yayagalanga omwana we abeere nga kitaawe. Mukiraba? Kale yafunanga omukuza omutuufu.

<sup>160</sup> Kaakati, oba nga omuntu ow'oku nsi yasobolanga okulowooza ku mukuza asingayo obulungi, olwo ate Katonda, Kitaffe? Kati, Teyafuna ba bisopu, na ba kalidinaali, na basaaseredooti. Yafuna Mwoyo Mutukuvu y'aba abeera Omukuza waffe. Era Omwoyo Omutukuvu ye Muyigiriza waffe. Era A—Ali mu Kkanisa, era Atwala obubaka eri Kitaffe.

<sup>161</sup> Naye kati watya ssinga taata, manyanga, omukuza ajja n'agamba nti, "Naye, Taata. . ." Kaakati, tajja kufuna mukuza eyeeraga, nga bwe mumanyi, ayagala kweraga, bwe tukiyyita. Agamba nti, "Naye kati, taata bwe nnaamubuulira ebikwata ku. . . Weewaawo, omuvubuka ye kyewaggula, naye ekyo singa—singa nkgamba kitaawe, kitaawe yandinyongeza omusaala." Oyo si mukuza mutuufu. Omukuza omutuufu aba mwesimbu, ayogera mazima.

<sup>162</sup> Bw'atyo n'Omwoyo Omutukuvu, atwogerako Mazima, bw'Ajja mu maaso ga Katonda. Weewaawo. Kale Ajja. Olowooza otya? Yandyennyamidde leero okumugamba nti, "Bawala Bo bonna basalako enviiri zaabwe, ate nga Wabagaana okukikola. Batabani Bo bajjudde ndowooza za bibiina bya buntu, ne batuuka n'okuba nti tebakyaafaayo omu ku munne. Ekyo bwe kiri. Era bakoppa *kino* mu kifo kya Kino, na *kino* mu kifo kya Kiri." Nga kyandimwennyamizza! Naye Omukuza oyo nga yandyagadde okujja agambe nti, "Ha, bannange! Omwana oyo mwana mulungi nnyo. Afaananira ddala Kitaawe." Ha, ekyo nga Yandyagadde okukyogera! Mukiraba?

Olwo Kitaffe nga alyoka yeenyumiriza nga agamba nti, "Ono mwana Wange!"

<sup>163</sup> Ky'ekyo kyennyini Katonda kye yakola ku Lusozi Olw'okufuusibwa. Mwekkaanye, waalabika Musa ne Eriya. Era Peetero, nga yenna akyamuukiridde; oluvannyuma lw'ekyaliwo ekyali kisusse ku ky'obutonde. Peetero yakyamuukirira, n'agamba nti, "Leka tuzimbe ensiisira ssatu, emu Yiyi, emu ya Musa, endala ya Eriya."

164 Aba akyayogera, Katonda n'amusala ekirimi. N'agamba nti, "Ono ye Mwana Wange omwagalwa gwe nsanyukira. Mumuwulire." Mukiraba? Katonda Yavaawo mu kifaananyi, n'agamba nti, "Ono ye Mwana Wange."

165 Musa yali akiikirira mateeka. Bannabbi baali bakiikirira bwenkanya Bwe. Twali tetusobola kutuukiriza mateeka Ge. Twali tetusobola kutuukana na mutindo gwa bwenkanya Bwe. Sisaba bwenkanya. Njagala kusaasirwa, so si bwenkanya. Sisobola kutuukiriza mateeka Ge, era sisobola kutuukana na mutindo gwa bwenkanya Bwe. Naye nneetaaga okusaasira Kwe. Era Katonda kye yava agamba nti amateeka n'obwenkanya byatuukirizibwa mu Ye. "Ye Mwana Wange omwagalwa. Mumuwulire. Ye Oyo. Ye Oyo."

166 Kaakati, mu Ndagaano Enkadde omwana oyo bwe yatongozebwanga, oba n'atuuzibwa mu kifo kye eky'obuyinza mu maka, erinnya lye lyabanga likola nga erya kitaawe ku ceeke. Yee, ssebo. Tebaalina . . . Baalinanga mpeta, mu nnaku ezo, kwe kwali nga okuteekako omukono, ke kaali akabonero. Era ba . . . [Ow'oluganda Branham akola eddoboosi nga ery'okuwanda amalusu era n'akuba ku kituuti—Omuk.] Yagiwandangako eddusu, n'agikoonako, n'ekolawo akabonero. Ekyo kyabanga . . . Omwana yayambalanga empeta ya kitaawe, akabonero ke. Era ekyo kye yakolanga kyabanga kitaawe y'akikoze.

167 Kaakati, ne Yesu bwe yagonda, Yesu bwe yagondera Katonda, Katonda yamuteeka mu kifo Kye mw'alina okuba n'agamba nti, "Y'ono."

168 Kati, bwe wabaawo mmemba azaalibwa n'Omwoyo Omutukuvu mu maka ga Katonda n'akakasibwa nti alina embala zino mu ye, Katonda n'amulabamu obulungi, okutegeera, okwefuga, obugumiikiriza, okwagala ab'oluganda, n'okutya Katonda, mu ye, awo nga Katonda amussaako envumbo, oba nga amutuuzza mu kifo kye. Era, awo, w'olabira abaana ba Katonda ab'obulenzi n'ab'obuwala.

169 Awo, Abaefeso 4:30 ne walyoka wagamba nti, "Temunakuwazanga Mwoyo Mutukuvu wa Katonda, eyabateesaako akabonero okutuusa ku Lunaku olw'okununulibwa kwammwe." Kati, eri abamu ku mmwe Ababaputisiti abaagala okugenda ku bukuumi Obutaggwaawo, kati, bw'otuuka ku mutendera ogwo, nja kukkiriziganya naawe ku bukuumi Obutaggwaawo, bw'otuuka awo.

170 Naye eby'okumala gagamba, buli asanze n'amala gagamba mbu, "Nneegasse ku kkanisa y'Ababaputisiti. Ndi Mupulesibiteriyani. Kale nnina obukuumi Obutaggwaawo." Ekyo kikyamu. Obulamwo bwo bwennyini bukakasa nti tobulina, okutuusa nga Kino okifunye.

171 Nga Katonda akutongozza n'akuteekako envumbo ku bw'Omwoyo Omutukuvu n'akusibira munda mu

Bwakabaka Bwe, awo tewaba kubufuluma. Obaako obukuumi Obutaggwaawo. Kkiriza. “Tonakuwazanga Mwoyo Mutukuvu wa Katonda oyo eyakuteesaako akabonero ggwe wenna n’embala zo ez’obwakatonda okutuusa ku Lunaku olw’okununulibwa.”

<sup>172</sup> Nzikiriza nti waliwo Omugole eyateekerwateekerwa. Nzikiriza nti Katonda yagamba Aliba “n’Ekkansa etaliiko bbala wadde olufuniro.” Nzikiriza mu kuteekateekerwa, nti Omugole yateekerwateekerwa. Ateekwa okubeerayo Eri. Nsuubira ndi Naye. Ekyo, mukiraba, ndi Naye. Kati kiri eri nze okukolerera obulokozi bwange ne Katonda, okutuusa nga ebintu *bino* Katonda abikakasizza, olwo ne nteekebwako envumbo mu Bwakabaka bwa Katonda. Oyo ye Mwoyo Omutukuvu. Egyo gye mirimu gya Katonda gyennyini. “Okuteekebwako envumbo okutuusa ku Lunaku olw’okununulibwa.”

Ekyo ky’ekirooto kye yaloota. Nnalowooza nti kyali kirungi.

<sup>173</sup> Kaakati, n’olwekyo, ekyo Omugole bw’akikola, Ekkansa eyo bw’etuuka mu kifo kino, oba omuntu ssekinnoomu, Ekkansa egenda kubeerayo Eri. Leka nkyogere bulungi nnyo musobole okukifuna obulungi. Ekkansa yateekerwateekerwa okubeerayo Eri. Njagala kubeera Nayo, naye engeri yokka gye nsobola okubeera Nayo, kwe kubeera ekitundu ku Yo. Nfuuka ntya ekitundu ku Yo? Nga ndi munda mu Yo. Ngiyingiramu ntya? Okuyita mu kubatizibwa, n’Omwoyo omu. Abakkolinso Ekisooka 12, “Ku bw’Omwoyo omu fenna tubatizibwa okuyingira mu Mubiri gumu.” Omubiri gumu; tubatizibwa bubatizibwa okuguyingiramu.

<sup>174</sup> Naye tosobola kunywezebwa ku buntu buno, n’ogamba mbu, “Nnayogera mu nnimi. Nnamufuna.” Bw’ova wano n’ogenda, n’osunguwala, n’omokkola agagambo, ne weeyisa bw’otyo. Okiraba? Ekyo kibanga kuteeka byoya bya nnyonyi muzinge ku—ku nnamunjoona. Okiraba? Tosobola kukikola. Obulamu bwo bwennyini bukakasa nti si bwe kiri.

<sup>175</sup> Naye ebintu bino bwe biba bikolera mu ggwe, nga Katonda y’abireetera okukola, awo kitegeeza watekebawo envumbo. Awo obeera togeegeenya bugeegeenya. Obeera ggwe kennyini. Awo okwolesebwa, Omwoyo Omutukuvu, emirimu gya Katonda, egituukiridde, na buli kimu, we birabisibwa, kubanga (lwaki?) ggwe ne Kristo mufuuse omu. Ka nsuubire nti ekyo kitegereekese. Ggwe ne Kristo mufuuse omu.

<sup>176</sup> Nnabaddewo wano n’ekintu ekirala kye nnawandiise, kye nnabadde njagala okulowoozaako. Kituleeta mu kifo eky’Obulamu. Olwo n’ofuuka...n’ofuna Obulamu Obutaggwaawo.

<sup>177</sup> Kaakati, wano nninawo enkuluze y’Oluyonaani eyitibwa, *Emphatic Diaglott*. Nnagisomamu luli nga nnina ekigambo kye nneekenneenya.

178 Kati, mu njiri ya Yokaana 14, manyanga Yokaana 3:16, tusanga, nga awamu wagamba nti, “alina Obulamu *obu'emirembe n'emirembe*.” Ate awalala ne wagamba nti, “alina Obulamu *Obutaggwaawo*.” Naye mu Luyonaani, mu ntaputa y'Oluynaani...Mu Lwebbulaniya, wagamba nti, “Obulamu obutakoma.” Mu kigambo eky'Oluynaani, mulimu a-i-n-i-o-a-n.

179 Kyenkana kiringa “*aeon*.” *Aeon* kye “kiseera” ekitayinza, gwe muwendo ogutayinza kubalibwa. Gusukka ku bukadde, n'obusiriivu, n'obuwumbi.

180 Naye kino kiri *aionios* y'ebiseera, Obulamu Obutaggwaawo. Era Ekigambo eky'Olungereza ekikozesebwa kiri Obutaggwaawo. Ffe tukimanyi nga Obutaggwaawo, *aionios*, oba “Obulamu obutakoma.” Mukiraba? Kati bw'oba n'Obulamu obutakoma, oyinza otya okuzikirira? Obeera ofuuse kitundu ku ekyo Ekitaggwaawo. Ate waliwo ekintu kimu kyokka Ekitaggwaawo.

181 Ssetaani si wa Butaggwaawo. Nedda. Ya—yafuuka bufuusi Ssetaani. Ggeyeena si ya Butaggwaawo. Ggeyeena yatondebwa butondebwa. Si ya Butaggwaawo. N'emibiri gino si gya Butaggwaawo. Gyatondebwa butondebwa.

182 Naye Omwoyo wa Katonda wa Butaggwaawo. Teyalina ntandikwa, era Talina nkomerero. Era engeri yokka gye tusobola okufunamu Obulamu Obutaggwaawo, okuva mu kigambo ekyo ely'Oluynaani, *Zoe*, ekitegeeza nti, “Obulamu bwa Katonda mwene,” tulina, tufuuka kitundu ku Katonda bwe tufuuka abaana ba Katonda ab'obulenzu n'ab'obuwala, ne tuba n'Obulamu obwa *aionios*. N'olwekyo ekitundu ekibeera ekiramu, mu ffe, ekitegeera Ekigambo kino, okuva wano okutuuka *wali*, ekyo ekitegeera, bwe Bulamu obwo obwa *aionios*, “Obulamu obutakoma.” Bwe Bulamu bwa Katonda Bwennyini mu ffe. Amiina. Whew!

183 Luli, bwe nnali mu lugendo, nnanyumyaako, n'Omujulirwa wa Yakuwa. Kati sigenderera kubaako nzikiriza ya muntu yenna gye ntyoboola. Tubalina bangi batudde wano abaakyuuka, okuva mu Bajulirwa ba Yakuwa. Omu ku bayima b'ekkanisa yaffe yali Mujulirwa wa Yakuwa, *yali*, naye n'alokoka, ye wamu n'ab'enju ye. Kitaawe yali musomi wa bitabo; Ow'oluganda Wood n'abalala. Baganda be bonna ne bannyina kati, kyenkana bonna bajja, era baafuna Omwoyo Omutukuvu, kubanga okwolesebwa kwa Katonda kwababuulira bye baakola. Ne bye ba...Mukiraba? Ekyo kye kyakikola.

184 Kaakati, naye wano, Abajulirwa ba Yakuwa mu kitabo kyabwe, kigamba nti omukka gw'ossa ye mmeeme. Kati, ekyo tekiyinza kuba kituufu. Omukka gw'ossa si ye mmeeme. Bwe kiba bwe kityo, kiba—kiba kitegeeza nti mu kiseera ekimu obeera mmeeme ya ngeri ndala, ate mu kiseera ekirala n'obeera

mmeeme ndala, omuntu omulala gy'aba assizza. Ggwe laba we wandibadde. Kaakati, omukka gw'ossa eba mpewo, era empewo eyo gy'ossa mu nnyindo zo.

<sup>185</sup> Kati, Ekyawandiikibwa bakisoma bakiva mabega gye kisemba ekigamba nti, “Katonda n'amufuuwamu Omukka mu nyindo ze, n'afuuka emmeeme ennamu.” Kati, njagala mbeeko ne kye mbabuuza. Bw'aba yali muntu, mukka gwa ngeri ki gwe yali assa Katonda bwe yali tannamufuuwamu Mukka Gwe ogw'Obulamu? Mukiraba? Mukka gwa ngeri ki? Yali assa, nga muntu omulamu. Kale, kati, ekyo bwe kiba bwe kityo, kitegeeza buli nsolo mmeeme ennamu, kubanga omukka gwe zissa ye mmeeme y'omuntu, n'olwekyo mmeeme zaffe, okutwaliza awamu. Kitegeeza Yesu yali teyetaaga kufa. Saddaaka y'ensolo yandibadde emala. Mukiraba? N'olwekyo, ow'oluganda, ensonga eyo tematiza.

<sup>186</sup> Naye Katonda kye yakola, Yamufuuwamu Omukka ogw'Obulamu Obutaggwaawo, amiina, olwo n'afuuka emmeeme ennamu, emmeeme etayinza kufa. Kati mwekkaanye. Tugenda kuyingira mu mubisi gw'enjuki, gubakulukutire ne ku nkokola. Weetegereze. “Yamufuuwamu Omukka ogw'Obulamu mu nnyindo ze, n'afuuka emmeeme Etaggwaawo.” Kubanga, Katonda ye yamufuuwamu, obutonde si bwe bwakikola, naye Katonda ye yakikola, n'amufuuwamu Omukka ogw'Obulamu mu nnyindo ze, n'afuuka emmeeme ennamu.

Kati oyinza okunŋamba nti, “Naye ate Adamu yafa, Ow'oluganda Branham.”

<sup>187</sup> Naye jjukira nti, Adamu bwe yali tannafa, yalina omwana gw'endiga ogwamununula. Aleruuya! “Abo be Yamanya edda, Yabayita.” Yafuna omwana gw'endiga ogw'okubanunula. Yali kifaananyi. Adamu yagwa. Olwo omwama gw'endiga ne guweebwaayo ku lwa Adamu, kubanga mu nnyindo ze yali yafuuyibwamu Omukka ogwa Katonda Ataggwaawo, n'afuuka emmeeme ennamu. Yali mwana wa Katonda.

<sup>188</sup> Ssi omukka gw'assa, nga ekigambo kye bakozesa mu Afirika. Ssimanyi mu Luyonaani bwe bakiyita, mu kaseera kano. Naye ekigambo kye bakozesa mu Afirika, bakiyita *amoyah*, ekitegeeza, “empewo; amaanyi agatalabika.” Ensolo zissa amoyah. Aboononyi bassa amoyah.

<sup>189</sup> Kati olwo lwaki twandibadde tufuba okufuna Obulamu Obutaggwaawo, bwe kiba nga eyo y'emmeeme Etaggwaawo eyafuuyibwamu bwe twafuuyibwamu omukka? Lwaki twandibadde tufuba okufuna Obulamu Obutaggwaawo? Tekikola makulu, ow'oluganda. Okiraba? Te—te—tekirina we kikolera makulu.

<sup>190</sup> Naye, Katonda, mu ngeri ey'enjawulo ku Adamu, yamufuuwamu Omukka ogw'Obulamu Obutaggwaawo, n'afuuka omuntu Ataggwaawo wamu ne Katonda. Yalina

obuyinza nga Katonda. Yali katonda omutono. Ye yali katonda w'ensi; si Katonda w'Eggulu, kati. Katonda w'ensi!

<sup>191</sup> Era lumu abaana ba Katonda baliddamu ne bafuuka bakatonda. Yesu bw'atyo bwe yayogera. “Tekyawandiikibwa mu mateeka gammwe nti, ‘Muli bakatonda?’ Kati abo be Yayita bwe muba musobola okubayita katonda, abo Katonda be yakyalira, Nze muyinza mutya okunvunaana, ne mugamba, bwe Injamba nti Ye nze Mwana wa Katonda?” Mukiraba? Kati tuli mu kuyingira mu kintu eky'obuziba. Kati kino mukyetegereze nga bwe tukinnyikiza.

<sup>192</sup> Kaakati, baabano. Kati mwana wa Katonda, naye akola ensobi. Akimanyi bulungi nti ky'akola kikyamu. Kati mujjukire nti, Adamu teyalimbibwa. Bayibuli bw'etyo bw'egamba. Timoseewo Ekisooka 3. “Adamu si ye yalimbibwa, naye omukazi oli ye yalimbibwa, n'aba mu kwonoona.” Adamu yeetaba mu ekyo Kaawa kye yakola, kubanga yali mukyala we.

<sup>193</sup> Kye kintu kye kimu ne Kristo, Ssetaani teyamulimba, naye yatambula n'ayingira okufa wamu n'Omugole. Yagenda yeegatte ku Mugole, Asobole okununula Ekkkanisa.

<sup>194</sup> Adamu yakimanya nti ali mu nsobi, bw'atyo n'agoberera Kaawa. Mukiraba? Naye waaliwo omwana gw'endiga ogwali gwaweewwayo ku lwabwe, nti baali baanunulibwa.

<sup>195</sup> N'abaana b'endiga bano, leero, Katonda be yamanyirawo edda, nabo Katonda abayise, waliwo Omununuzi. “Tewali muntu ayinza kujja gye Ndi okuggyako nga Kitange y'amuwaludde. Era bonna Kitange be yampa baliija gye Ndi.” Si bwe kiri? N'olwekyo waliwo Omwana gw'endiga ogwaweewwayo, okuva ku kutondebwa kw'ensi, amannya gaabwe we gaawandiikibwa mu Kitabo ky'Obulamu eky'Omwana gw'endiga. Omwana gw'endiga gwaweewwayo, okusobola okukolawo ekkubo ery'ekisa eri buli omu ku bo okugenda mu kuzuukira, Omwana gw'endiga ogwaweewwayo; Omwana gw'endiga gwa Adamu, kaakati mwekkaanye, nga Adamu bwe yalina omwana gw'endiga ogwaweewwayo.

<sup>196</sup> Kati, eyo y'Ekkkanisa leero. Ssitegeeza ka—kkanisa. Ye mubadde mumanyi?

<sup>197</sup> Kino ssikyogera kuvvoola, era ssigenderera kulumya muntu yenna. Ssiri wano kukola ekyo, era nga bwe nnennyonyoddeko edda. Ndi wano kuyamba, naye kye ngezaako okukola . . .

<sup>198</sup> Mumanyi? Amazima gali nti, amakanisa gano si makanisa. Waliwo Ekkkanisa emu yokka. Bino bibiina bya munnomukabi. Mukiraba? Bibiina bya munnomukabi. Ssirina mutawaana gwonna. . . Birungi. Naye ekyo nja—njagala nkibakakase, mu ddakiika ntono, nti bibiina bubiina ebya munnomukabi. Oli wa kibiina ky'Abamesodisiti ekya munnomukabi, oli wa kibiina ky'Abapulesibiteriyani ekya munnomukabi, oba oli wa kibiina ky'Abapentekoote ekya munnomukabi, n'ebirala ebya

buli ngeri. Weewaawo, um-hum. Bibiina bya munnomukabi! Mukiraba? Toyinza...Mukiraba? Eky'amazima amakanisa bibiina bya munnomukabi abantu abafaanaganya endowooza gye bakunŋaanira awamu.

<sup>199</sup> Naye Ekkanisa eri Emu. Era tosobola kwegatta ku Kkanisa. Ogizaalibwamu buzaalibwa. Era bw'ogizaalibwaamu, olwo n'ofuuka mmemba Waayo.

<sup>200</sup> Kiringa famire yange. Mbadde kitundu ku famire ya Branham okumala emyaka ataano mu esatu. Tebansabangako kwegatta ku famire. Lwaki? Tekinneetaagisa kwegatta ku famire. Nnazaalibwa ndi omu ku ba Branham.

<sup>201</sup> Ne mu Kkanisa ozaalibwamu buzaalibwa. Kati, zino endala zonna bibiina bya munnomukabi. Ekyo mwali mukirowoozezzaako? Yee, ssebo.

<sup>202</sup> Lumu nnali nsaawa omuddo, nga bwe ndowooza, ku, "Ekkanisa Katolika enkulu entukuvu," nga bwe bagiyita. Nga bwe nŋenda, nsaawa.

<sup>203</sup> Ne wabaawo Ekintu ekyannyimiriza, nga kya maanyi ddala, ne kinŋamba nti, "Togiyita bw'Otyo." Ne nneetoolooza amaaso. Ne nziramu okusaawa. Ne Kiddamu ne kinnyimiriza, ne kigamba nti, "Toziyita bw'Otyo." Ne kigamba nti, "Ebyo bibiina bya munnomukabi, nga ebirala. Ezo si Kkanisa. Ekkanisa eri emu." Mukiraba? Abo ba mmemba ba kibiina kya munnomukabi, kubanga osobola okwegatta ku kibiina kya munnomukabi. Naye tosobola kwegatta ku Kkanisa. Ekkanisa, ogizaalibwamu buzaalibwa. Ofuuka mmemba Waayo okuyita mu Kuzaalibwa obuggya, olwo n'ofuuka mmemba wa Famire, ow'oluganda oba mwannyinaffe mu Yo.

<sup>204</sup> Kati, leka mbeeko ne kye mbasomera wano okuva mu kitabo kya *Emphatic Diaglott*, eky'ekyawandiikibwa eky'Okubikkulirwa 17:3, wamu n'Okubikkulirwa kwa *Emphatic Diaglott* wano. Era kino mukyekkaanye bulungi, nga bwe kisoma, n'engeri—n'engeri gye kigeraageranyizibwa obulungi na kiri. Okubikkulirwa 16, 17. Kale. Kati leka tusome wano katono. Kino mukiwulirize, n'obwegendereza, Okubikkulirwa 17:3.

*Era omu ku Bamalayika ABO OMUSANVU nga alina...*  
*Ebibya OMUSANVU n'ajja n'ayogera nange,...*

<sup>205</sup> Mbasomera, okuva mu *Lexicon*. "Nga alina..."

...*"Jangu, nange nnaakulaga OMUSANGO GW'OMWENZI*  
*OYO OMUKULU, oyo atuula ku Mazzi Amangi;*

<sup>206</sup> Era ekyo ffenna tukimanyi nti eyo ye Vatikaani. Tulina wano olupapula lw'amawulire oluyitibwa *Our Sunday Visitor*, okuva mu ekereziya Katolika, olututegeeza kyennyini omwenzi oyo kyali. Mukiraba?



207 Era baayanukula bwe bati ku nsonga eyo, baagamba nti, “Naye lindako katono.” Yagamba nti, “Wabaddewo amannya aga buli ngeri,” n’agamba nti, “agasobola okuweza omuwendo ogwa lukaaga nkaaga mu mukaaga.”

Ne nḡamba nti, “Naye lindako katono.”

N’agamba nti, “N’erinnya lyo lisobola okukola lukaaga . . .”

208 “Naye,” ne nḡamba nti, “Naye, nze ssituula ku busozi musanvu, nga nfuga ensi yonna, okiraba.” Uh-huh! Okiraba? Bwe kiri. Okiraba?

209 [Ow’oluganda Branham asoma Okubikkulirwa 17:1 okuva mu kitabo *The Emphatic Diaglott*—Omuk.]

. . . *naakulaga OMUSANGO GWA MALAAYA OMUKULU*, atuula ku *Mazzi Amangi*;

210 *Amazzi*, Okubikkulirwa 17:15, kitegeeza “nnamungi era enkuyanja y’abantu abakwatiridde.” Okiraba?

*BAKABAKA B’ENSI gwe baakabawala naye, n’abo ABATUULA ku NSI* ne batamiira *OMWENGE gwa . . . gw’OKUKABAWAZA kwe*.

211 Kati kiki ekyaddirira?

*N’antwala, mu Ddungu, mu Mwoyo; . . .*

212 Kaakati ebyo biri mu kitabo ekiyitibwa *Emphatic Diaglott*. Mukiraba?

. . . *ne ndaba Omukazi nga atudde ku Nsolo emmyufu, ng’eujjdde Amannya Agavvoola, . . .*

213 Kati, mu nzivuunula eyatongozobwa Ssekabaka Yakobo, kigamba nti, “nga ejjudde amannya ag’obuvvoozi.” Munnindemu katono, leka nkifune wano, katono. Okubikkulirwa, olunyiriri olw’oku 3. Kale, kiikino. Kale. Okubikkulirwa, mbadde ntegeeza 17, si 7; 17, kati muwulirize olunyiriri olw’oku 3.

*Era n’antwala mu mwoyo mu ddungu: ne ndaba omukazi nga atudde ku nsolo emmyufu, ng’ejjudde amannya ag’obuvvoozi, . . .*

214 Olungereza bwe lutyo bwe lwakivvuunula. Naye okuva mu nzivuunula ey’Oluyonaani eyasooka okuva mu *The Diaglott* kisoma bwe kiti, mu Kubikkulirwa 17:3. Muwulirize.

*N’antwala, mu Mwoyo, mu Ddungu; ne ndaba Omukazi atudde ku Nsolo emmyufu—Ensolo, ng’ejjudde Amannya Agavvoola, . . .*

215 Ebibiri byawukanira ddala, okuva ku kya “amannya ag’obuvvoozi” n’ekya “amannya agavvoola.” Kye kiki? Era tu . . . Kati, ye yali:

. . . *NNYINA W’ABENZI . . .*

216 Ekyo ffenna tukimanyi. Naye ekyo kiki? [Ow'oluganda agamba nti, "Ekereziya Katolika ey'e Rooma."—OmuK.] Tekikwetaagisa kuba . . . Weewaawo, ekyo bwe kiri, eyo ebeera ekereziya Katolika ey'e Rooma. Naye "ejjudde amannya agavvoola," Abamesodisiti, Ababaputisiti, Abapulesibeteriyani, Abaluzalaani, nga bonna beeyita, "amakanisa ga Katonda." amannya agavvoola! Waliwo enjawulo nnene nnyo wakati wa "amannya ag'obuvvoozi" ne "amannya agavvoola." Beeyita, "Ekkanisa ya Katonda," naye nga mu maaso g'ensi bakola byabwe; omuli okuzannya amatatu, n'okunywa omwenge, n'okwejeeguula, n'ebijjulo, n'ebirala, n'ebirala ebiringa ebyo.

217 Waliwo Ekkanisa emu yokka. Ogizaalibwamu buzaalibwa. Toyinza kugiyingiramu okutuusa nga onaaziddwa mu Musaayi gw'Omwana gw'endiga n'osibibwako akabonero n'Omwoyo Omutukuvu.

218 Nga waliwo enjawulo nnene nnyo wakati wa "amannya ag'obuvvoozi" ne "amannya agavvoola." Mukitegeera? [Ekibiina kiddamu nti, "Amiina."—OmuK.]

219 Ekyo nnakitegedde ku makya ga leero bwe nnabadde nsoma wano, e . . . Bwe nnabadde nzijja, waliwo Ekintu ekyanjambye nti, "Genda mu kisenge kyo. Okwate ekitaboo *The Diaglott*."

220 Kati, olina kugonda bugonzi. Ky'ekyo kyokka. Kale nayingide munda. Ne nkiggyayo ne mbikkula Okubikkulirwa 17. Nga bwe nnee buuzi nti, "Kino Oyagala nsome kyaki?" Ne ntandika okusoma. [Ow'oluganda Branham akuba entoli—OmuK.] Olwabadde okubikkula nti, "Nga kye kiikyo." Ne nfuuna ekkalaamu enkalu ne nkiwandiika. Ne njamba nti, "Kiikyo."

221 Kati, bwe banvunaana olw'okuvumirira ebibiina by'amadiini. Ago ge mannya agavvoola, abeeyita "amakanisa ga Katonda, n'amakanisa ga Kristo, n'amakanisa g'Abamesodisiti, n'amakanisa." Ebyo bibiina bya munnomukabi, si makanisa.

222 Ekkanisa eri emu yokka, y'Ekkanisa ya Mukama waffe Yesu Kristo. Era Ekkanisa eyo kye kiki? Gwe Mubiri gwa Yesu Kristo ogutalabika na maaso ogukolera ku nsi, ogukolebwa ba mmemba okuva mu kibiina kyonna ku bibiina bino eby'abakkiriza, abandibadde ekitundu ku Mubiri gwa Kristo. Olina kuguzaalibwamu, so si kugwegattako bwegassi.

223 Era okubyegattako, kuba kwegatta ku mannya agavvoola, kwegatta ku mukazi ono. Omukazi ono, amaanyi ge!

224 Era ndowooza mulaba ekigenda mu maaso gye bagenda okutwala abantu bonna abalina endowooza ezaawukana ku nsonga z'eddiini, babaweereze mu Alaska. Mukirabye. Enzikiriza zaffe zonna ezikkiririza mu bintu ebitali bya bulijjo.

225 Era kiki ekigenda mu maaso? Akakiiko, Akakiiko akagatta Amakanisa g'Ensi yonna wamu n'Abakatuliki

balina akafubo akagenda mu maaso e Vatikaani, nga eyo, gye bagezaako okusinziira. Wamu ne ba bisopu bano, n'abalala, bonna bagezaako okukkaanya awamu, basobole okulwanyisa enkola y'obwannaakalyak'ani. Ensi nga erwanyisa obwannaakalyak'ani, naye ate nga yeegatta ku Bukatuliki.

226 Kiringa bwe kiri leero. Tuutuno, nga bwe nnagambye. Tuli mu . . . Eby'enfunu byaffe kyenkana bigudde. Tuli mu kwewola, na kusaasaanya ssente mu kiseera kino, ku misolo egijja okusasulwa emyaka kkumi n'ena okuva leero. Awo we tutuuse. Ani alina ssente z'ensi yonna? Ekereziya Katolika. Amerika eyinza kukola ki okuzeewola? Bo okusobola okuyimirizaawo kampuni za taaba zino n'emylene n'ebirala. Mazima ddala bajja kuzibeewolako. Era bwe banaakikola, obusika bwabwe bajja kuba babutunze, nga babuwaddeyo, eri ekereziya Katolika ey'e Rooma. Twegatte. Mukirabe kiikino, kyeraga kyokka, kya lwatu n'okusinga okusoma olupapula lw'amawulire. Kiikino wano. Mukiraba?

227 Bali awo Bamesodisiti, Babaputisiti, Bapulesibeteriyani, n'ebirala bye beeyita, nga beeyita, "Ekkansa ya Katonda." Abakatuliki n'ebirala ebyo byonna bye beeyita ge maanyi g'ensolo gano agajjudde amannya agavvoola. Nga mweyita mbu, "Ndi . . ." Nnagamba . . .

228 Jjuuzi wano nnagenda mu ddwaliro, ebbanga si ddene eriyise, okubaako ne gwe nsabira. Ne njamba nti, "Tugenda ku . . ." Yali maama wange. Ne njamba nti, "Tugenda kusabira maama."

Omukyala kwe kugamba nti, "Zzaawo olutimbe olwo."

Ne mmubuuza nti, "Toli Mukristaayo?"

N'agamba nti, "Ffe tuli Bamesodisiti."

229 Ne njamba nti, "Weebale. Mbadde ndowooza nti oba oli awo oli mukkiriza." Ne nzizaawo olutimbe ne lumusiikiriza. Mukiraba? Naye, bw'oba toli Mukristaayo, ate ekyo kirala. Mukiraba?

230 Naye, "Ffe tuli Bamesodisiti," okwo kuvvoola. Ensolo, amakanisa, agayitibwa amakanisa, si makanisa. Ekyo leka nkakase nti kikwatiddwa ku lutambi. Weewaawo. Si makanisa. Bibiina bya munnomukabi. Abantu bye beegattako.

231 Naye Ekkansa ya Katonda omulamu tosobola kugyegattako bwegassi. Ogizaalibwamu buzaalibwa, okuyita mu kubatizibwa kw'Omwoyo Omutukuvu. Era bw'obatizibwa n'Omwoyo Omutukuvu, embala zino zisibirwa munda mu ggwe, nga zisibibwa Omwoyo Omutukuvu, na bwe kityo, "Oyo azaalibwa Katonda tayonoona." "Tasobola." Kiikyo. O, bannange!

Tusobola okwogera olunaku lwonna, si bwe kiri?

232 Ekkansa gwe Mubiri gwa Kristo ogutalabika na maaso, oguzaalibwa Omukka gwa Katonda. Oooh! Mukifunye?

[Ekibiina kiddamu nti, “Amiina.”—Omuk.] Ekkanisa ya Katonda ezaalibwa Mukka gwa Katonda. Katonda yafuuwa Omukka mu nnyindo, za Adamu, mu njogera ey’omwoyo, n’afuuka emmeeme ennamu. Mubadde mukimanyi nti abapentekoote, manyanga Ekkanisa y’abapentekoote eya nnamaddala, ezaalibwa Mukka gwa Katonda?

<sup>233</sup> Muleke mbeeko ne kye mbasomera, mu kaseera katono ekikwata ku ekyo. Leka ndabe, mu kaseera katono. Enjiri y’Omutukuvu Yokaana, nzikiriza, we ηηenda. Tugenda kukizuula oba nga Ekkanisa ya Katonda, ezaalibwa ekyo, oba nedda. Enjiri y’Omutukuvu Yokaana, leka tulabe, nzikiriza kiri awo nga mu lunyiriri olw’e 16, 19; essuula eya 20. Kale. Nzikiriza tugenda kukisanga, wano wennyini. Kale. Ka mbasomere, tulabe oba nga Ekkanisa ezaalibwa Mukka gwa Katonda, oba nedda, nga Adamu bwe yali ku lubereberye. Mwekkaanye.

*Era ku lunaku luli akawungeezi, ku lunaku olusooka mu nnaku omusanvu, enzigi bwe zaali nga ziggaddwawo abayigirizwa mwe baali, olw’okutya Abayudaaya, Yesu yajja n’ayimirira wakati mu bo, n’abagamba nti, Emirembe gibe mu mmwe.*

*Era bwe yamala okwogera bw’atyo, n’abalaga... engalo ze n’embiriizi ze. Awo... Abayigirizwa ne basanyuka, bwe baalaba Mukama waabwe. Awo Yesu... .*

*Awo Yesu n’abagamba nate nti, Emirembe gibe mu mmwe: nga Kitange bwe yantuma nze,... nange bwentyo mbasindika mmwe.*

<sup>234</sup> Mwekkaanye. Kitaawe eyamutuma yayingira munda mu Ye. Ne Yesu, bw’Atuma omuyigirizwa, Ayingira munda mu ye. Ye Oli y’omu eyatuma; Katonda.

*Era bwe yamala okwogera ekyo, n’abassiza omukka, n’agamba nti... Mutoole Omwoyo Omutukuvu:*

<sup>235</sup> Ekkanisa, nga ezaalibwa Omukka gwa Katonda! Ekigera kino bwe kimala okwezimba okutuuka waggulu eri, mu ngeri entuufu, olwo nga Omukka gwa Katonda gufuuyibwa ku mbala ezo nti, “Toola Omwoyo Omutukuvu,” kati awo obeera mwana wa Katonda. Osobola okwegatta ku kintu kyonna ky’oyagala, naye obeera wazaalibwa mu Kkanisa ya Katonda omulamu, nga wazaalibwa Omukka gwa Katonda. Katonda yabassiza omukka, n’agamba nti, “Mutoole,” whew, “Omwoyo Omutukuvu.” O, bannange! Kiikeyo.

<sup>236</sup> Si, “Jangu otwegatteko, oteeke erinnya lyo wano.” N’ebijjulo byammwe n’ebirala byonna bye mukola, awo obeera wegasse ku kibiina ekya munnomukabi. Osobola okwegatta ku kibiina ky’Abamesodisiti ekya munnomukabi, oba eky’Ababaputisiti ekya munnomukabi, oba eky’Abapulesibiteriyani ekya munnomukabi, oba eky’Abakatuliki ekya munnomukabi,

oba eky'Abapentekoote eky'a munnomukabi, osobola okwegatta ku kintu kyonna ky'oyagala okwegattako, naye obeera weegasse ku kibiina kya munnomukabi.

<sup>237</sup> Naye bw'ofuuka omwana wa Katonda, obeera ozaaliddwa Omukka gwa Katonda. Amiina. Kisingako n'okireka nga bwe kiri, awo wennyini. Kale.

<sup>238</sup> Obulamu bwa Katonda naawe buba bukulumu, Yesu yagamba. Mulindeeko katonu. Yesu yagamba nti, "Nze Muzabbibu. Mmwe ttabi."

<sup>239</sup> Kati mulabeeyo. Kiki ekyabaleeteranga okukaayana ne Yesu? Baakaayana ne Yesu, kubanga Yali Muntu naye ate nga Yeefuula Katonda. Yali Katonda. Katonda yali mu Kristo. Mukiraba? Era Yabagamba. Yagamba nti, "Temutunuulira Nze. Si Nze. Ye Kitange, era Abeera mu Nze." O! Mukiraba?

<sup>240</sup> Kati, bo baali batunuulira mubiri ogwo ogwazaalibwa Maliyamu. Mukiraba? Oyo teyali Katonda. Oyo yali Mwana wa Katonda, naye Katonda yali munda mu Mubiri ogwo. Yali Katonda. Yagamba nti, "Bwe mba Ssikola mirimu gya Kitange, kale awo munnunimurize. Naye ani ku mmwe asobola okunnumiriza ekibi, okuba nti ssikkiriza Kigambo? Kigambo ki Katonda kye yayogera ekitatuukiriridde mu Nze?" Ekibi bwe butakkiriza. "Ani ku mmwe annunimuriza ekibi?" Ekibi bwe butakkiriza. "Mundage. Bwe mba Ssikola mirimu gya Kitange, kale temunzikiriza. Naye bwe mba nga Nkola mirimu gya... Wadde temuyinza kunzikiriza, waakiri mukkirize emirimu gye Nkola, kubanga gye gikakasa kye ndi." Kubanga, "Kitange ali mu Nze, nga Yeewaako obujulizi." Kubanga, "Katonda yali mu Kristo, nga atabaganya ensi okugizza gy'Ali." Mukitegeera? [Ekibiina kiddamu nti, "Amiina."—Omu.]

<sup>241</sup> Naye, kati, Obulamu bwe bumu obuli mu Muzabbibu bwe buli ne mu ttabi. Onaakwatagana otya n'Obulamu obwo? Tekisoboka.

<sup>242</sup> Nnina omuti gwe nnalaba ebbanga si ddene eriyise, mu luggya lw'Ow'oluganda Sharrit mu Arizona, nga guliko ebibala mwenda eby'enjawulo ebigwa mu kiti ky'omucungwa. Kyali kiki? Gwali—gwali muti gwa mucungwa, omucungwa gw'akakundi. Naye gwaliko e—gwaliko e—enniimu, mangada, ennimaawa, ssecungwa. Gwaliko ebibala eby'engeri ezitali zimu. Ne nnyimirira, ne nneekaliriza omuti ogwo. Ne mmubuuza nti, "Ow'oluganda Sharrit, oyagala kunjamba nti omuti ogwo ddala muti gwa mucungwa?"

N'agamba nti, "Mazima ddala."

<sup>243</sup> Ne mmubuuza nti, "Naye, kisoboka kitya? Kijja kitya?" Ne njamba nti, "Ngulabako ssecungwa wano, ne mangada wano, n'ennimaawa wano, n'enniimu wano, n'ebibala ebirala. Kisoboka kitya?"

N'anṅamba nti, "Kale, olaba, byakookerwako bukookerwa."  
 244 "O!" Kye nnavu mmugamba nti, "Naye, kati nnina kye njagala okukubuuza. Kati, mu kaseera kano ogunogako ssecungwa ono n'ennimu. Kati, omwaka ogujja, oligunogako ki? Guliddamu ne gubala emicungwa."

"Ha, nedda." N'agamba nti, "Era gujja kubala nnimu. Okiraba?"

"O," kye nnavu mmugamba nti, "weebale." Mukiraba?

Tosobola kukikola. Tosobola kugugattamu kirala.

245 "Naye," n'agamba nti, "buli mulundi omuti ogwo lwe gweyongerako omwaka ne guteekako ettabi eddala, ettabi eryo libala micungwa, bwe kiba nga ekikolo kyennyini kye kitaddeko ettabi eryo eriggya."

246 Naye ffe kye tugezezzaako okukola kwe kumwegattako Ye nga bammemba, ne tutambulira wansi w'erinnya ly'Obukristaayo. Kubanga, tuli, nga bwe tuyinza okukiyita tuli bibala ebigwa mu kika ky'emicungwa, Ekkanisa y'Abakristaayo.

247 Naye Omuzabbibu Gwennyini bwe gussaako ettabi, lijja kuba nga Omuzabbibu gwe Lyassaako mu kusooka. Bwe kiba nti Omuzabbibu gwe Lyassaako mu kusooka bwe gwabala, baaguwandiika Ekitabo ky'Ebikolwa by'Abatume; bwe guliddamu ne guteekako ettabi eddala, nalyo Lijja kuwandiika ekitabo ky'ebikolwa. Kituufu.

248 N'olwekyo, bino mubeera mu kwegatta ku bibiina bya munnomukabi. Naye bw'ozaalibwa Omuzabbibu... Obala ebibala. Ekyo kituufu. Obala ebibala, naye mmwe mubikozesa ki? "Mufaanana nga abatya Katonda, naye ate mwegaana amaanyi agali mu kumutya." Mwegaana obubonero. Mwegaana ebyamagero. Mwegaana Omwoyo Omutukuvu. Mwegaana okwogera mu nnimi. Mwegaana okwolesebwa. Mwegaana obunnabbi. Mwegaana okuwonyezebwa. Ate, bwe muva awo ne, "Mweyita erinnya." Ky'ova olaba Omwoyo Omutukuvu yagamba nti, "Amaanyi, ag'ebibiina by'abantu, ebijjudde amannya agavvoola, mazima ddala, nga beeyita, 'Abakristaayo.'" "Nga balina ekifaananyi eky'okutya Katonda, naye nga beegaana amaanyi gaakwo. Abali nga abo obakubanga amabega, kubanga abo be banyaga abakazi abasirusiru abazitoowererwa okwegomba okutali kumu."

249 Ebibiina ebya buli ngeri! Tujjuzza ekkanisa ebibiina, ekibiina kya *kino*, n'ekibiina kya *kiri*. Kati ekibiina kya Yesu Kristo kyo kiri wa? Mukiraba? Tulina ebintu ebirala bino byonna, era tuzitoowerezza ekkanisa. Kati ekyo kye kigenda mu maaso.

Tosobola kwegatta bweggassi ku Kkanisa.

250 Weegatta ku kibiina kya munnomukabi. Obeera mmemba wa kibiina kya munnomukabi, ekibiina ky'abantu, nga ekibiina

kya munnomukabi bwe kibeera. “Ffe *kino* kye tukkiririzaamu. Tulina ebiragiro kwe tutambulira. Tulina ebyama byaffe, n’ebirala.” Nammwe mukola ekintu kye kimu, eky’enjawulo ekiriwo nti mwegatta ku kiyitibwa ekkansa.

<sup>251</sup> Naye tosobola kwegatta ku Kkanisa. Ekyo weegatta ku bwa mmemba bwa kibiina kya munnomukabi, so si ku Kkanisa, kubanga Ekkansa nga yo ogizaalibwamu buzaalibwa ne mu Muzabbibu Gwennyini.

<sup>252</sup> Kati mulindeeko katono. Mulabeeyo. Injenda kumaliriza, mu kaseera katono. Mwetegereze. Munsonyiwe. Ekyo ssi—ssigenderedde kukyogera. Mwetegereze. Mulabeeyo.

<sup>253</sup> Katonda bw’aba yagatta wamu Omugole ono nga akozesa Omwoyo oyo, era bw’atyo Agatta wamu n’omuntu ssekinnoomu nga akozesa Omwoyo oyo, mukiraba, olwo n’ozaalibwa mu Bwakabaka obwo. Era Obulamu buli bwennyini obwali mu Kkanisa *eno*, bwe buli ne mu Kkanisa *eyo, n’Eyo, n’Eyo, n’Eyo, n’Eyo*. Era Obulamu bwennyini obwali mu kikuta, Omuzabbibu, Yesu, buli ne mu mmemba gw’Azadde. Ekitiibwa! “N’ebintu bye bimu bye Nkola, emirimu gye Nkola, nammwe muligikola.” Oyo ye mmemba omutuufu ow’Omubiri gwa Kristo, teyeepaatiiseeko linnya lya ngeri yonna. Ebikolwa by’omuntu oyo byennyini biraga wa gye yava. Obulamu bwe butegeza ky’ali.

<sup>254</sup> “Oli mmemba nnabaki? Oli wa mu mubiri ki?” Mubiri gwa Kristo. “Kale, wagwegattirako wa?” Ssaagwegattako bweggassi. Nnaguzaalibwamu. Mukiraba? Nnaguzaalibwamu.

<sup>255</sup> Teweetaaga na kubagamba. Ekyabaawo bakimanyi. “Ggwe, oyinza otya okukoleeza ettabaaza ate n’ogibikkako ekisero?” Bw’Atyo bwe yagamba. Mukiraba? Nedda, nnedda.

<sup>256</sup> Bw’ozaalibwa mu Bwakabaka bwa Katonda obwo, olwo Obulamu, buba Bulamu bwennyini obwali mu Yesu. Awo ojja kufaayo eri emmeeme. Awo tojja kwetaaga kwegayirira bantu, kujja ku wolutaali. Tojja kwetaaga kwegayirira muntu yenna, kujja alindiririre wamu n’abo abali ku wolutaali. Weewaawo. E—e—e—ebintu bijja kuba byekola byokka, kubanga Busibiddwa munda mu ggwe. Ogattiddwa wamu ne Katonda. Osibiddwako envumbo n’Omwoyo Omutukuvu.

Kati mutegedde “Omwoyo Omutukuvu” ky’ategeza?

<sup>257</sup> Tekitegeeza, “Nnabuukabuuka ne ndeekaana. Nnafuna enneewulira ey’enjawulo.” Ebyo birungi. Nnabuuka ne ndeekaana, ne nneewulira mu ngeri ey’enjawulo. “Nnayogera mu nnimi.” Weewaawo nzikiriza Omwoyo Omutukuvu ayogera mu nnimi. Mazima ddala. “Nnavvunula ennimi.” Yee, ssebo. Ekyo, nakyo nkikiriza. Naye ebyo si ye Mwoyo Omutukuvu. Ebyo si bye njogerako. Wayinza okubaawo omuwaatwa awantu awamu. Wayinza okubaawo omuwaatwa *wano*, mu bugumiikiriza bwo.

258 Leka wabeewo akukuba oluyi ku ttama erimu, mu maaso, okyusa ettama eddala? Naye ogamba nti, “Munnanfuusi oyo omukyafu!” Kati ekyo kiraga nti waliwo omuwaatwa, awantu awamu, waliwo awawummuse. Ekyo leka tukireke. Kale. Naye mutegeera kye ntegeeza.

259 Naye bw’ossibwako akabonero n’osibirwa mu Mubiri gwa Kristo, awo obeera ojuziddwa Omwoyo, nga oli mwana wa Katonda.

260 Ha, kale ssinga mbadde nninayo eddakiika nga kkumi, okubaako ne kye nsoma wano. [Ekibiina kiddamu nti, “Genda mu maaso. Kisome, ow’oluganda.”—OmuK.] Naye musobola okunnumiikirizaayo eddakiika endala kkumi? [“Yee.”] Nnina kye njagala nsome, kitono nnyo. Kati, mu bwesimbu, sigenda kulwaawo. Mbakakasa, mukiraba, bwe tunaasoma kino mu ddakiika ntono nnyo. Kirungi nnyo kizibu okukivaako. Nninawo wano ebintu bitono nnyo, ebyakanzijira, bye nnandyagadde okwogera.

261 Leka tubikkule mu njiri y’Omutukuvu Yokaana, essuula ey’oku 3, awogera ku Bulamu Obutaggwaawo. Leka tulabe kye Kigamba wano ku nsonga eno ey’Obulamu Obutaggwaawo, Obulamu bwa Katonda. Kaakati, kati mulabeeyo wano.

*Waliwo omuntu ow’omu Bafalisaayo, erinnya lye Nikoodemu, mwami mu Bayudaaya:*

*Oyo n’ajja ekiro eri Yesu, n’amugamba nti, Labbi, tumanyi nti oli muyigiriza eyava eri Katonda: . . . tewali muntu ayinza kukola byamagero bino. . . wabula nga Katonda ali naye.*

262 Kati, bali, ab’Olukiiko olukulu, baali bakimanyi nti Ye Mwana wa Katonda. Baali bakimanyi. Wuuno wano omufuzi waabwe, nga agamba Yesu nti, “Tumanyi nti Oli Muyigiriza eyava eri Katonda, kubanga Obulamu bwa Katonda bwennyini bukulukutira mu Ggwe.” Mukiraba? “Tumanyi nti by’Oyigiriza si bibyo nga Ggwe. Wabula bya Katonda, kubanga Katonda abikakasa.” Mukiraba? “Obulamu bwa Katonda bukulukutira mu Ggwe.” Kati mwekkaanye.

*Yesu n’addamu n’amugamba nti, Ddala, . . . nkugamba nti, Omuntu bw’atazalibwa mulundi gwa kubiri, tayinza kulaba bwakabaka bwa Katonda.*

263 O, bannange! “Okuggyako nga weegasse ku kkanisa yange”? O! Mulaba bwe bawuguka ne bamuvaako? Mukiraba? Mukiraba?

*Yesu, awo Yesu n’addamu n’amugamba nti, Ddala, ddala, nkugamba nti, Omuntu bw’atazalibwa mazzi na. . . Mwoyo, tayinza kuyingira mu bwakabaka bwa Katonda.*

*Ekizaalibwa . . . omubiri kiba mubiri;  
n’ekizaalibwa . . . Omwoyo kiba mwoyo.*



*Teweewuunya kubanga nkugamba nti, Oteekwa okuzaalibwa omulundi ogw'okubiri.*

*Empewo ekuntira gy'eyagala, . . . Mukiraba, kizzeeyo nate, mukiraba, kizzeeyo, mukiraba.*

*Empewo ekuntira gy'eyagala, . . . toyinza kuwulira kuwuumu . . . owulira okuwuumu kwaayo, naye toyinza kutegeera gy'eva, newankubadde gy'egenda: bw'atyo bw'abeera buli muntu . . . azaalibwa Omwoyo.*

*Nikoodemu n'addamu n'amugamba nti, Ebyo biyinza bitya okubaaawo?*

*Yesu n'addamu n'amugamba nti, Ggwe omuyigiriza wa Isiraeri, n'ototegeera ebyo?*

264 Ekyo kyetegereze, ow'oluganda, ggwe a—alina D.D., Ph.D., L. bbiri ne D., mukiraba, “N'ototegeera bintu bino?”

*Ddala, . . . nkugamba nti, Twogera kye tumanyi, era tutegeza kye twalaba; naye temukkiriza kutegeza kwaffe.*

265 “Ebintu bino tubimanyi. Tubirabye. Tumumanyi, naye tokkiriza kutegeza kwaffe.” Ggwe eyeegatta obwegassi ku kkanisa! Mukiraba?

*Bwe mbabuulidde ebyensi, ne mutakkiriza, mulikkiriza mutya bwe nnaababuulira . . . eby'omu ggulu?*

266 Kati muwulirize kino wano. Mwekkaanye.

*Era tewali muntu eyali alinnye mu ggulu, wabula oyo eyava mu ggulu, ye Mwana w'omuntu ali mu ggulu.*

267 Kati ekyo mukinnyonnyole.

268 Omanyi, lumu, Yababuuza nti, “Kristo mumulowoozaako mutya? Ye Mwana w'Ani?”

Ne bagamba nti, “Ye Mwana wa Dawudi.”

269 N'ababuuza nti, “Kati ate lwaki Dawudi, mu Mwoyo, yamwogerako nti, ‘Mukama yagamba Mukama wange nti, ‘Tuula ku mukono Gwange ogwa ddyo’”? Yali ayinza atya okuba Mukama We ate nga Mwana We?” Tewali muntu yeetantala kuddamu kumubuuza kintu kyonna.

270 Mu Kubikkulirwa, Yagamba nti, “Nze Kikolo era Omuzukkulu wa Dawudi.” Mukiraba? “Nze Muzabbibu era Ettabi. Nze lubereberye. Nnaliwo nga olubereberye terunnabaawo. Nze nnali olubereberye, era—era, Nze nnali Omuzukkulu We.”

271 Kati, wano Yagamba nti, “Tewali muntu yali asse wansi okuva mu Ggulu, wabula Omwana w'omuntu mu kaseera kano ali mu Ggulu.”

272 Lumu waliwo omukyala, eyambuuzza, ekibuuzo. Ne mmugamba nti, “Nnyanukula kino.”

Yambuuzza nti, “Yesu yali asaba Ani, mu lusuku e Gesusemane?”

273 Nange ne mmubuuza nti, “Ani gwe Yali ayogerako bwe Yagamba nti, ‘Tewali muntu yali alinnye mu Ggulu, wabula Oyo eyava mu Ggulu, nga Ye Mwana w’omuntu ali mu . . . kaakano ali mu Ggulu?’ Ani?”

274 Wuuno, Ayimiridde wano waggulu ku nnyumba ayogera ne Nikoodemu, kyokka amugamba nti, “Ndi mu Ggulu.” Si bwe kiri? Ekyo leka tukiterekere akawungeezi. Mulaba mutya? [Ekibiina kiddamu nti, “Amiina.”—Omuk.] Obudde buyise nnyo. Ha, bannange! Mukifumiitirizeeko okumala akaseera, ettuntu ly’olwa leero.

275 Oyingira otya mu Kkanisa? [Ekibiina kiddamu nti, “Ozaalibwa.”—Omuk.] Ozaalibwa. Nga ozaalibwa ki? Omukka gwa Katonda.

Nzisaako omukka, nzisaako omukka;  
Omwoyo wa Katonda omulamu, nzisaako  
omukka.

276 Okwo kwe kusaba kwange: leka Omwoyo Omutukuvu asse omukka. O, bannange! Kubanga, Omukka gwa Katonda, gutegeeza ki? Kussibwako nvumbo munda mu Bwakabaka bwa Katonda, nga nkimanyi nti, bwe nnayatula omulundi ogwasooka, nnakkiriza Yesu Kristo. Weewaawo.

Kati, ku Kukkiriza, ne nnyongerako obulungi, obulungi bwa Katonda.

Ku bulungi bwange, nnyongerako okutegeera Ekigambo.

277 Ku kutegeera kwange, nnyongerako, okwefuga, okwegendereza. Ekyo nkyagala nnyo. “Eggwanga lyange liryo, tikkira emmeme yange n’okwefuga, okuva ku nnyanja okutuusa ku nnyanja eyakaayakana.” Mukiraba?

278 Obugumiikiriza. O, bannange! Nga ogezeseddwa. Teweeraliikirira; Ssetaani ajja kubikubalira. Kaakano nnyambuka amadaala. Mukiraba? Nyongeddeko obulungi, okutegeera, okwefuga, kati nnina okwongerako obugumiikiriza. Naye era ssinnafuna Mwoyo Mutukuvu.

279 Bwe mmala okwongerako okugumiikiriza, ate ne nnyongerako okutya Katonda. Ekyo mumanyi kye kitegeeza? Kufaanana Katonda. Ekyo nakyo ne nkyongerako. Ne sseevisa bubu. Naye ne nneevisa nga omusajja Omukristaayo omuntumulamu bw’asaanidde okweyisa. Ekyo leka kireme kuba kintu ky’okaniikirira obukaniikirizi. Leka kibeere nga kiva munda mu nze, nga kwagala kwa Katonda, kwe kubumbujja. Okiraba? Mukiraba? Si kugamba mbu, “Uh-

uh-uh-uh, nkukakasa, nmandikikoze, naye oba oli awo leka nkireke.” Mukiraba? Huh-uh. Huh-uh. Kitegeeza, era mwekiri.

<sup>280</sup> Kuba Kuzaalibwa. Nnazaalibwa mu *kino*, mu *kino*, mu *kino*, mu *kino*, mu *kino*, mu *kino*, mu *kino*. Olwo okwagala kwa Katonda, Kristo, ne kukka wansi ebyo byonna ne kubiteekako envumbo ne kubisibira munda mu nze, olw’okuweereza. Mukiraba?

<sup>281</sup> Kati olwo kiki ky’Akola bw’Ampa Omwoyo Omutukuvu? Akwawula n’akuteeka mu kifo ekikyoo wekka, n’akulamba. Okiraba? Awo obeera muntu wa njawulo. Okuva awo, oba tokwali wa nsi. Okiraba? Obeera oyambaziddwa mu ngeri ya njawulo. Obeera oyambadde mu ngeri ya njawulo. Si n’ekyambalo kino eky’oku ngulu. Nedda, nedda. Tekikwetaagisa kulabika mu ngeri ya njawulo era etali ya bulijjo, n’ekitogi eky’ekikuggu, nga olinga, gwe bakolako omukolo gw’okutikkirwa. Nedda, nedda. Ekyo si ky’okola. Oyambala, engoye, bw’oti nga bulijjo. Ekyambalo eky’omwoyo kye kikulu. Obeera oyambaziddwa ekyambalo ky’embaga. Olwo obeera kiki?

<sup>282</sup> Nga Yesu, mulabeeyo, Yasiikirizibwa, era n’Awanyisibwa awo wennyini nga balaba, ekyambalo Kye ne kyakaayakana nga enjuba. Wuuyo awo, Yesu, Katonda nga ateka Omwana We Yennyini mu kifo eky’obuyinza. Mukiraba? Oluvannyuma ne wajja Musa. Ne Eriya n’ajja. Awo Peetero n’agamba nti, “Naye omanyi, ki—kirungi ffe okubeera wano.” Mulaba omuntu bw’akyamuka? Weewaawo. O, olwalaba ekisukkulumye ku bya bulijjo nga kikoleddwa! N’agamba nti, “Leka tuzimbe ensisira ssatu. Leka tuzimbe emu nga ya Musa, endala ya Eriya, n’endala nga Yiyo.”

<sup>283</sup> Era aba tannamaliriza kwogera, Katonda n’amusalako, n’agamba nti, “Ono ye Mwana Wange omwagalwa. Mu bintu bino byonna bye Nnalagira Musa okukola, ne nteekawo n’amateeka okuyita mu Musa; n’obwenkanya okuyita mu bannabbi; byonna Abituukirizza. Mumuwulire. Nze kaakano leka nzire ku bbali. Muwulire Ye. Muwulire Ye.” O, bannange! Nga kintu kirungi nnyo!

<sup>284</sup> Kati, bwe tumala okutuukiriza ebisaanyizo bino, ne tujjula embala za Katonda wamu n’ebintu bya Katonda, olwo nga Omwoyo Omutukuvu akka wansi nga atussaako envumbo nga atusibira mu Bwakabaka. Temweraliikirira. Buli omu ajja kukimanya bw’anaamufuna. Tekijja kukwetaagisa kugamba nti, “Bannange, ekitiibwa kibe eri Katonda, mmanyi nnamufuna. Nnayogera mu nnimi. Ekitiibwa kibe eri Katonda, mmanyi nnamufuna. Nnazinirako mu Mwoyo.” Tekijja kwetaagisa kubaako ky’oyogera. Buli omu ajja kukimanya nti wamufuna. Teweeraliikirira. Weewaawo. Ajja kweweera obujulizi. Ajja kukkiriza kimanyibwe mu makkati g’abantu.

285 Katonda abawe omukisa. Nsanyuse nnyo okubeera wano nammwe enkya ya leero, ne tubeera n'ekiseera kino eky'okussa ekimu. Muwulirize, ekanisa yaffe ntono, era tetulina kifo wa kutuuza bantu ababa bazze wano. Tetuli kibiina kya ddiini. Tukkiriza era tussa kimu na buli kibiina kya ddiini. Wano mujjawo kubanga mwagala okujja. Era nammwe, tubaagala. Era twagala buli kibiina kya ddiini, buli muntu. . .

286 Nzikiriza nti mu bibiina by'amadiini ebyo byonna waliyo abantu Abakristaayo. Baganda baffe era bannyinaffe mu Kristo.

287 Kale, n'olwekyo, tetulina bukwakkulizo bwonna, tewali kye weegattako, tewali ky'olina kukola okuggyako okubeera obubeezi Omukristaayo. Nga E. Howard Cadle bwe yateranga okugamba nti, "Tetulina teeka wabula okwagala, tetulina kitabo kirala kyonna okuggyako Bayibuli, tetulina kikwate kya nzikiriza wabula Kristo." Ekyo kituufu. Jangu otukyalire. Tujja kusanyuka. Tukkiriza Enjiri Enzijuvu, buli katundu ku Kigambo. Tukikiriza nga bwe kiri. Tetukyongerako kintu kyonna, wadde okukitooleko ekintu kyonna, wadde okukigattako ekintu kyonna okuva mu bibiina by'eddiini. Tukireka nga bwe Kiri. Ky'ekyo. Era tuba basanyufu bulijjo okuba nammwe. Tukwaniriza okukunjaana naffe bw'obeera osobodde. Tusabira abalwadde. Tukkiriza buli kimu kyonna Bayibuli ky'egamba okukola. Ffe "twerabira obunafu bwaffe, tubuleka emabega, nga tukunukkiriza okutuuka awali akabonero ak'Okuyitibwa okwa waggulu."

288 Kati, ekintu ekirala kimu. Munakkiriza kyogerwe? Okwosa jjo ku makya. . . Bwe munaaba mwetegerezza ku—lubaawo wabweru awo, kuliko okwolesebwa. Nnafuna okwolesebwa. Zaali ssaawa nga kkumi n'emu ku makya, mukyala wange erudda wali akimanyi, oba kkumi na bbiri. Nnali nzuukuse. Twali tuzuukuse okuteekateeka abaana okugenda ku ssomero.

289 Okwolesebwa kuno, bulijjo ntera okukufuna. Era mwenna mukimanyi bulungi, buli omu ku mmwe wano, nti tekulema kutuukirira. Bulijjo, kutuukiririra ddala. Mukiraba? Tekulemwa kutuukirira.

290 Kati nnalowooza nti nze muntu asingayo okuba omusanyufu gwe nnali ndabye. Nnali nnyimiridde mu nnjuba, e-n-j-u-b-a, era nnali—nga mbuulira Enjiri eri ekibiina ky'abantu, ekinene ennyo.

291 [Ow'oluganda Branham asiriikiriramu katono—Omu.] Mbadde njagala kulaba oba nga bikwatibwa ku lutambi.

292 E—ekibiina ky'abantu, ekinene ennyo, era baali batudde mu kibira. Era amagulu g'enjuba gaali gaabakako, wano na wali, nga bwe bakiwulira, nga bwe bawulira Ekigambo.

293 Era nze, nga bulijjo, ndwaawo nnyo, mbalwisaawo nnyo, ndwaawo nnyo nga mbuulira. Kati nnalwaawo nnyo nga mbuulira, okutuusa ekibiina ky'abantu abaali bampuliriza

lwe baalumwa enjala y'emmere ey'omubiri. N'abamu, ku bo, ne bakoowa. Kye baava basituka, ne bagenda okwenoonyeza eky'okulya, ne batandika okugenda.

Ne mbagamba nti, “Temugenda. Temugenda.”

<sup>294</sup> Nnalina ebintu bya mirundi ebiri bye nnali njagala okumaliriza nabyo, bye nnali njagala okutuukako, mu bubaka bwange. Era Mukama ye yali abumpadde. Buli mubuulizi yenna akimanyi, nti bw'oba nga ddala okimanyi nti Katonda y'abukuwadde, obeera oyaayaana okububuulira abantu.

<sup>295</sup> Kati nnali mbuulira, Charlie, n'amaanyi ddala nga bwe nsobola okubuulira, nga bwe nzikaatiriza, nga bwe mumanyi, nga bwe njamba nti, “Ebintu bino byonna ebikulu, *kino* Katonda ky'akola. Mulabeeyo *kino*. Ayawula ebirowoozo by'omu mutima. Kye kiki? Kye Kigambo.” Nga bwe mbuulira bw'entyo. Era, ha, singa mbadde nsobola okujjukira bye nnali njogera n'omutwe gw'eky'okuyigirizaako kyange. Ssibijjukira. Mukiraba? Naye nnali mbuulira bubuulizi.

<sup>296</sup> Era nnali nneeraba nga nkikola. Era kati mba ndi awo nyimiridde, nneetegera, nneeraba bwe nkibuulira.

<sup>297</sup> Era nnali mbuulira, n'amaanyi gange gonna. Bwe waayitawo akaseera, ne nsituka, omanyi, ne ndowooza muli nti, “Ekitiibwa kibe eri Katonda!” Ne njamba nti, “Mulabe ebintu bino ebirungi, na *kino*, na *kiri*!”

<sup>298</sup> Butereevu, njenda okulaba nga abantu enjala etandise okubalumira ddala. Kale baali balidde emmere ey'omwoyo emala, bwe batyo ne batandika okuvaawo. Abamu ku bo ne baayuyya [Ow'oluganda Branham ayayuyya—Omu.] ne batandika okuvaawo.

Muli ne nneebuza nti, “Abantu babadde ki?”

<sup>299</sup> Ne—ne ntunula, ne ndaba abafumbo abakyali abato nga batambula, baja gyendi. Muli ne ndowooza nti... Kye nava njamba nti, “Lindako katonu, mukwano! Lindako katonu! Mujja kukomawo nga enjuba egoloobye.” Mukiraba? Ne njamba nti, “Mujja kukomawo. Naye mulinde nsooke mbawe kino ekisembayo. Ebintu bino byonna biva wa, bye mbalaze? Biva wa?” Ne njamba nti, “Biibino wano. Biri mu Kigambo kya Katonda. Biri BW'ATI BW'AYOGERA MUKAMA, kisuubizo Kye. Kubanga,” ne njamba nti, “mwenna muli bajulirwa bange, nti, omulimu gwange gwe nnatumibwa okukola guli nti, ‘Nywerera ku Kigambo.’” Ne njamba nti, “Kikyamu ki ekibaliko mwenna? Temusobola kutegeera Kigambo? Muteekwa okukitegeera.”

<sup>300</sup> Abamu ku bo kye baava bagamba nti, “Owaaye, nze njagalayo ku bisikwiiti,” n'ebirala bwe batyo.

<sup>301</sup> Kati, mu nze kye nava njamba nti, “Kale, ekitiibwa kibe eri Katonda! Bwe baba baagala bisikwiiti, ka bagende bamufune.”

302 Kye na—kye nnava nkyuka. Muli ne njamba nti, “Ha, naye, omanyi? Enjuba egenda kugolooba, mu kaseera katonno, nnyo.” Ne njamba nti, “Kati, akawungeezi, ekibiina ekyo bwe kinaaba kikomyewo, nja kugenda mu maaso mbawe ekitundu ekyo kye njagala okumaliriza nakyoo, era mbagambe nti ebintu bye bandabye nkola bisangibwa mu Kigambo kya Katonda, si mu kitabo eky’enfumo obufumo oba mu kibiina ky’eddiini. Wabula bisangibwa mu Kigambo. Mukiraba? Buli kimu ku byo, biri mu Kigambo, kubanga nnatumibwa eri Ekyo.”

303 Muli ne ndowooza nti, “Omanyi, bonna, buli omu ku bo, bajja kukomawo akawungeezi, era kino kye nja okukola. Nja kuddako emabega katonno, mbeere nga atekawo omusingi.” Mumanyi engeri gye nkikolamu ku mireembe gy’ekkanisa gino n’ebirala, ne nziramu ne njogera bye nnayogera mu kusooka. “Nja kukiteerawo omusingi, nga nkyesigamya ku Kigambo, olwo ndyoke ntuuke, ku ntikko eno ey’ekitalo.” Ne njamba nti, “Nga kajja kuba kaseera kanyuvu nnyo! Katonda atenderezebwe!” Ne nneeraba nga njenda nkendeera, ne mpulira nti, “Katonda atenderezebwe.” Ne nneeraba nga njenda nvaawo mpolampola *bwe ntyo*. Njenda okweraba, nga nnyimiridde awo.

304 Kati, kuno kwe kuvuunulwa kw’okwolesebwa okwo. Mukiraba? Ebintu bye nnasooka okukola, ebintu ebikoleddwa, abantu babadde tebabitegeera, abasinga obungi ku bo. Ssitegeeza abakkiriza Enjiri Enzijuuvu n’abatukuvu ba Katonda, naye, ntegeeza, mu bantu abasinga obungi. Ate temwandiyagadde kutunuulira nsi, kosmos, nga Obubaka bwa Katonda. Bw’ogenda n’ogamba nti . . .

305 Nga Boze bwe yagamba nti, “Bulijjo mbaddenga...” Yagamba nti, “Nnaloota ekirooto, emyaka mingi egyayita, nti—nti Katonda alintuma njenda mu Chicago era nnyeenye Chicago olw’ekitiibwa kya Katonda.”

Ne mugamba nti, “Joseph, ekyo Yakikola dda.”

Kye yava ambuuzza nti, “Naye, nga babadde tebanyeenyeezebwanaga okuva mu biseera bya Moody.”

306 Ne mmugamba nti, “Ekyo ky’otegeeza? Nze njogera ku Kkanisa. Abo abasigadde balinze kwokebwa. Abo nfuufu ya nsi, ekibinja ekyo ekikwatiridde ku nguudo, ba Yezebeeri abeesiize langi n’abalala aba buli ngeri.” Ne njamba nti, “Abo bali bweru eri. Ebibiina ebyo ebinene ebya munnomukabi n’ebirala bijja kusaanawo byonna bigwe eyo mu nguudo.” Ne njamba nti, “Ayogera ku Kkanisa. Ekkkanisa eyalaba okubikkulirwa kwa Yesu Kristo nga alabisiddwa, era ne bamutegeera. Bayinza obutawera kkumi na bataano abaliva mu Chicago. Bayinza obutawera kkumi mu mulembe guno, okuva mu kibuga kyonna ekyo Chicago, abalifulumayo.”

307 Ekyo mwali mukirowoozezzaako? “Nga bwe kyali mu biro bya Nuwa, bwe kityo bwe kiriba ne mu Kujja

kw'Omwana w'omuntu, omwalokolebwa abantu omunaana." Uh-huh. Bameka abaava mu Sodoma? Mulaba kye ntegeeza? Mbuusabuusa nga baliwera olubatu. Mukiraba?

308 Naye Ekkanisa Yo yennyini bafunye okunyeenyzebwa. Bakutegedde. Ekigambo baakitegeera. Baalaba Ekigambo bwe Kyayambala omubiri, era ne bakikwata. Kati, kaakano ekyo mukyekaanye okumala eddakiika.

309 Era Obubaka buno obwasooka, buli lwe baabulabanga, buli omu yabwettaniranga, nga bagamba kimu, "O, ekitiibwa kibe eri Katonda! Nyabula, singa ndaba *kino*, na *kiri*, *n'ekirala*." Naye ne bagenda, nga bwe bajja. Mukiraba?

310 Naye kati bawoza kimu, "Wabula, ssimanyi. Ggwe wandyegasse ku eriwa yonna? Bwe sseegatta ku *eno*, *kino* kye kijja okubaawo. Ate *eno*, bajja kungoba, ate *n'eno* mbeere nga sikyalina kye nkolayo." Ab'oluganda batuula wansi ne beewuunaganya nti, "Naye kati, nandikoze ki bwe nga...?" Mukiraba ekyo? Tebagumiikiriza kimala kukitegeera nti Kye Kigambo Katonda kye yasubiza, kye kirabisiddwa. Mukiraba? Nga bavaawo.

311 Naye, temweraliikirira, ebisiikirize bisembedde, mukiraba, bwe ndiddayo mu njiri.

312 Mujjukira, ekiro kiri, Obubaka bwe Yampa obukwata mu kiseera ekyo bwe nnali nga nsimba ejjinja liri ery'oku nsonda? Ky'ekyo kyennyini. Bwali bugamba nti, "Kolanga omulimu..." Yanjamba nti, "Bw'ova mu kwolesebwa kuno, soma Timoseewo Eky'okubiri 4." Mumanyi, nga kyatekebwa wansi awo wennyini mu jjinja ery'oku nsonda, emyaka asatu mu esatu egiyise.

313 Yagamba nti, "Kolanga omulimu gw'omubuulizi w'enjiri, tuukirizanga okuweereza kwo. Kubanga ebiro birijja lwe batalikkiriza kuwulira Kuyigiriza kwa bulamu; naye olw'okwegomba kwabwe balikunjaanya abayigiriza, nga amatu gabasiwa; okulekanga enfumo... balikyama okulekanga Amazima okugobereranga enfumo." Ekyo bwe kiba tekituukiridde ddala nga bwe kigamba, kigambo ku kigambo! [Ebbanga ejjereere ku lutambi—OmuK.]

314 Naye, era, mujjukire, ekiro kya luli, lwe nnali sisomanga kitundu kiddako. Okumala emyaka asatu n'omusobyoo gye mbuulidde mu kkuunjaaniro lino, tewali mulundi n'ogumu lwe nnali nsusse awo, era nange simanyi lwaki.

315 Mbaddenga nneewuunya, okutuusa, lumu, lwe nnalaba Yesu we yakwata Omuzingo n'atandika okusoma, n'asoma ekitundu ky'obunnabbi, n'akoma awo, n'agamba nti, bwe yali e Kaperunawumu, n'Agamba nti, "Era leero, obunnabbi buno butuukiridde." Lwaki ebirala teyabisoma? Byali bikwata ku Kujja Kwe okw'omulundi ogw'okubiri. Mukiraba?

<sup>316</sup> Nange ekitundu ekyo ekirala nnakisoma, nga ssimanyi na kumanya. Nakikwata, nga kye kiikyo kyennyini, mu maaso gange, bwe nnali mu Southern Pines, mu South Carolina. Ku makya ago, bwe nnali nga nnyimiridde awo, nga njogera ne Joseph Boze, nga nneesigamye ku mmotoka, ne nkifuna. [Ow’oluganda Branham akuba entoli—Omuk.] Pawulo yagamba nti, “Nze... Abantu bonna banneefuulira. Tewali n’omu ali awamu nange. Dema yandekawo; nga ayagala emirembe egya kaakano. Era nze kati...” Mulabeeyo. “N’omuweesi w’ebikomo yankola obubi bungi.”

<sup>317</sup> Mulabe Dema ky’ayinza okuba nga yalowooza: “Naye ddala, ndabye Pawulo nga abuulira Enjiri n’awonya abalwadde. Naye kati wuuno wano, abonaabona, yekka, nga atambula ne dokita amujjanjaba, Lukka. Buli wamu w’agenda, agenda ne dokita, omusajja abuulira nti Katonda awonya. Ate nga, nnali mmulabye nga aziba omusajja amaaso. Yamugamba nti, ‘Mukama akunenye, era ojja kuba muzibe okumala ekiseera.’ Naye ate n’akkiriza omuweesi w’ebikomo okumugoba mu lukunnaana. Alabika takyalina maanyi gaziba bantu maaso. Kitalo nnyo, takyalina maanyi ga kuwonyezebwa kwa Bwakatonda. Katonda yamuvaako.”

<sup>318</sup> Sirowooza nti Dema yagenda mu nsi, kubanga Dema yali ava mu... mumanyi ebyafaayo bye. Yali ava mu maka amanene, ate nga magagga. Kale yali ayagala kutambulira mu bulamu bwe bumu n’abalala.

<sup>319</sup> Naye, Pawulo, musajja watu Pawulo. Kyali kiki? Katonda bulijjo aleka obuweereza ne butuuka mu mbeera bw’etyo, ate oluvannyuma n’abutikkira engule.

<sup>320</sup> Yaleka Yesu n’atuuka mu kifo. Mwekkaanye. N’aba nga Asobola okuzuukiza abafu, nga Asobola okukola kyonna ky’Ayagala; naye ate n’akkiriza omusirikale Omuluumi okumusika ebirevu Bye, n’amuwandulira n’amulusu mu maaso Ge. [Ow’oluganda Branham akola eddoboosi ly’okuwandula—Omuk.] N’amukuba ku... N’amusiba ekiwero ku maaso, n’amugamba nti, “Kati, bw’oba Omanyi, banjamba mbu Oli Nnabbi.” Bonna ne bamwetooloola nga balina emmuli, ne bamukuba ku mutwe. [Ow’oluganda Branham abaako ne ky’akuba.] Ne bamugamba nti, “Kati tubuulire ani akukubye.” Yali amanyi ani amukubye. Uh-huh. Ddala. Yali amumanyi. Mukiraba? Naye obuweereza Bwe bwali busemberedde okutikkirwa engule.

<sup>321</sup> Bulijjo butuuka mu kiseera we bulabika nga obunafu ennyo, ennyo ddala, nga bulinga obusaanawo, awo Katonda n’alyoka abutikkira engule.

Ai Mukama, leka kibeewo. Leka kibeewo, Mukama.

Leka tukoteke emitwe gyaffe.

Mmwagala, mmwagala



Kubanga Ye yasooka . . .

Kati mumusinze. Tubadde n'okuyigiriza okukalubo.

Era n'asasulira obulokozi bwange  
Ku muti gw'e Kalivaaliyo.

322 Leka tuyimuse emikono gyaffe gy'Ali kaakano.

Nze . . .

Kati mubeere mu Mwoyo, mulaba, "Mmwagala."

. . . Mmwagala  
Kubanga Ye yasooka okunjagala.  
Era n'asasulira obulokozi bwange  
Ku muti gw'e Kalivaaliyo.

323 Kati, leka tuyimirire, ku bigere byaffe.

Mu kayimba kaffe akatusiibula, bwe tuyimba ekitundu ekisooka, tugenda kukwataganako mu ngalo; ekitundu eky'okubiri, tugenda kukiyimpira Katonda. Kale. Oluvannyuma tusiibulwe.

Kati, ka tuluyimbe:

Twalanga Erinnya lya Yesu,  
Ggwe omwana ow'ennaku n'okulumwa;  
Lijja kukuwa essanyu era likugumye,  
Litwale buli gy'ogenda yonna.

Erinnya ery'omuwendo, O nga ddungi!  
Lye ssuubi ly'ensi era essanyu ly'Eggulu;  
Erinnya ery'omuwendo, O nga ddungi!  
Lye ssuubi ly'ensi . . . Eggulu.

324 Kati, mujjukire kino, kati. Njenda kubaako ow'oluganda wano, gwe nsaba, gwe nnabadde naye mu kisenge eddakiika ntono eziyise; o—ow'oluganda omulungi, omuminsani eri aba Assemblies abali mu ddungu; nneerabidde erinnya lye, njenda kumusaba, atusiibule mu kusaba nga tumaze okuyimba ekitundu kino ekiddako:

Twalanga Erinnya lya Yesu,  
Nga Engabo eri buli kyambika;  
Era ebikemo bwe bikwetooloola,  
Yatula bwatuzi Erinnya eryo Ettukuvu mu  
kusaba.

325 Olyoke olabe emizimu bwe gibuna emiwabo. Mukiraba? Kati, mujjukire nti:

Twalanga Erinnya lya Yesu,  
Nga Engabo eri buli kyambika;  
Era ebikemo bwe bikwetooloola,  
Yimirira buyimirizi, oyatule Erinnya eryo  
Ettukuvu mu kusaba.

326 Olabe ekinaabaawo. Kale. Kaakano fenna wamu.

Twalanga Erinnya lya Yesu,  
 Nga Engabo eri buli kyambika;  
 Ebikemo bwe bikwetooloola, (Onookola ki,  
 kati?)

Yatula bwatuzi Erinnya eryo Ettukuvu mu  
 kusaba.

Erinnya ery'omuwendo, (Erinnya  
 ery'omuwendo!) O nga ddungi! (O nga  
 ddungi!)

Lye ssuubi ly'ensi era essanyu ly'Eggulu;  
 Ery'omuwendo... (. . .? . . .mulaba omuwala  
 oyo omuto . . .? . . .) O nga ddungi! (Jangu  
 wano, mukwano.)

Ly'essuubi ly'e . . .


<sup>327</sup> Nga bw'oyimiridde wano: Omulundi gwe nnasembayo okuba mu kkuṅṅaaniro, wano (Maama ono aseka nga bw'asonga ku mwana.), omwana ono yali ayambadde ekisipi ekimuyambako ku bulumi. Naye kati wuuno, adduka bwe yeetala eno n'eri, azannya bulungi leero. Ekyo si kirungi? Mukama yeebazibwe. Kati, mulabeeyo: Mukwano, buukabuukamukko awo, obalage, nga bw'osobola okudduka ne weetala. Mukiraba?

O, Erinnya ery'omuwendo, (Kati,  
 mujjukire, waliyo okulya Okussa ekimu  
 akawungeezi.) . . .nga ddungi!

Lye ssuubi ly'ensi era essanyu ly'Eggulu;  
 Erinnya ery'omuwendo, O nga ddungi!

Lye ssuubi ly'ensi era essanyu ly'e . . .

<sup>328</sup> Kaakano leka tukoteke emitwe gyaffe. Era tujjukire enkuṅṅaana ez'akawungeezi, kati; era waliwo okulya Okussa ekimu akawungeezi ka leero. Era mwenna mujjukire nti, mmwe, Abakristaayo, tubaaniriza okujja okulya Okussa ekimu awamu naffe. Tusubira okubeera n'ekiseera ekirungi ddala.

<sup>329</sup> Omusumba waffe omwagalwa, wano, Ow'oluganda Neville, ne . . .Bameka abaagala Ow'oluganda Neville? Muddeemu nti, "Amiina." [Ekibiina kiddamu nti, "Amiina."— Omuk.] Muwulirize, ab'oluganda, mumpulirize nga . . .nga omu ku basumba b'omu kkuṅṅaaniro wano: Muyimirire wamu n'Ow'oluganda Neville. Muyimirire naye. Mukiraba? Muweereza wa Kristo. Muyimirire naye. Bayibuli egamba nti, "Tukuṅṅaanenga wamu: nga bwe tulaba nga olunaku luli olubi lusembedde kumpi." Mujje mu nkuṅṅaana, mujje; leka tujje era tuyimirire wamu n'omusumba waffe. Mukiraba? Twekwatire ddala ku . . . 

62-1104M Amannya Agavvoola  
mu Kkuṅṅaaniro Iya Branham  
e Jeffersonville, Indiana Amerika

LUGANDA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Ekirango ky'obwannanyini

Obwannanyini bwonna bwesigaliziddwa. Ekitabo kino kisobola okukubibwa mu kyapa ku kyuma ekikuba empapula eky'awaka nga eky'omuntu okwesomera ku bubwe oba nga eky'okugaba, ku bwereere, nga ekikozesebwa eky'okubunyisa Enjiri ya Yesu Kristo. Ekitabo kino tekikikirizibwa kutundibwa, kukubibwa mu bungi, kuwanikibwa ku mutimbagano gw'ensi yonna, kuterekebwa mu ngeri yonna etali ya kyapa, kuvvuunulwa mu nnimi ndala, oba okukozesebwa okusaba ssente awatali kufuna lukusa mu buwandiike okuva mu Voice Of God Recordings®.

Okumanya ebisingawo oba ebintu ebirala bye tulina, tukusaba otuukirire:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)